



16687

8
10

曾文正公批牘卷三

同治二年癸亥歲十月起安慶行轅

統領飛虎等營石鎮清吉稟謝蒙恩賞賜對聯

天情尚

該鎮於四年相見時已自樸實耐勞近於戰守二事講求更精今歲以四營防守廬州要地整飭戎行誅鋤匪類使大股賊不敢近城官民多相稱頌若非以廉儉持躬以嚴明馭眾焉能如此若常持此心何難鍊成名將儲為大用發去楹聯願諸將士益相勸勉不足言謝也

鮑提督超稟請派防各處以便大隊進剿廣德并請假回

籍由

批牘卷三

一

前於建平東壩並復後本部堂又令陞字五營守高瀆鈞字五營守建平請貴軍全部守東壩為各路游擊之師業經續行咨達昨准彭部堂緘報溧水已於十二日收復調陞營由高瀆往守并稱速謀溧陽必可一鼓攻下如果收復溧陽句容只好於金陵曾部院大營撥兵守之洪容海須守高瀆貴軍畱為游擊之用不能再撥守兵矣貴軍門陳請歸葬情詞迫切具見孝思純篤東壩先復奏請給假本部堂原有成約惟此時機局與春閒訂約之時又不相同貴軍門官至一品忠勳簡在帝心

滅賊之志與感

恩思報之誠必應夢寐不忘

國事家事

必能視同一體知所緩急無俟本部堂數數堅畱也仍請查照

歷次函牘批答勉畱五箇月以成大功風水之說不足深信靈
樞入城一節已於前緘內批明卽咨四川督部堂并札飭本籍
夔州府知照矣至寄家辦喪銀兩未能落實良用廝念兄弟之
間惟有從寬善處不可稍失和氣貴軍門後福方長區區耗費
卽他人用之尚不足惜况兄弟耶

統帶湘皖等營蔣道凝學稟拔營抵霍日期并成參將擬
自率三營力疾進剿由

成參將自率三營進剿亦無不可旣與潘林各練一路進兵總
須推誠布公不可盡用權術嚴禁兵勇騷擾可以使之心服官
軍力任其難不稍退怯亦可使之畏威也

管理湘中右等營毛道有銘稟明率老廟集五營進紮蘇

王壩由

據稟及另單輿圖均已閱悉前因該道與六安曾道函稱正陽
有機可乘後路不虞抄截故派該道會同周軍進取正陽久不
見稟報拔營日期以爲奉調卽行矣茲據稱李軍尙未進攻下
蔡壽城之賊猶恐時出滋擾又恐王家灣黃家埂塘各匪圩包
抄我軍後路難於進攻各等語閱之殊深詫異然則該道與六
安曾道通函欲攻正陽之時李軍已進取下蔡乎王家灣黃家
埂塘當時遂無匪圩乎出爾反爾不能自踐其言殊不可解正
陽東南北之水據圖稱晴久則涸入冬以來連晴二十餘日想

亦可搭造浮橋渡兵進剿矣昨批令周軍卽由王家灣進兵以
攻正陽該道與之或分或合板橋集老廟集之營或撤或畱此
等小處本部堂概不遙制概由該道自主但不准不攻正陽而
以收撫苗圩輕輕了事耳所以急於進兵者原冀掣動賊勢以
解蒙圍若文報往返太多耽閣太久蒙城不守苗勢大張則該
軍與周軍方自守之不暇豈復似前此之有機可乘哉李軍門
方銳志進圖下蔡老巢或不暇繞過壽南附近壽城之圩大抵
平日則自附苗黨官軍至則自稱良圩及戰爭之際苗勝則助
苗官軍勝則助官譬若草從風靡可南可北李軍門所攻民圩
數十果能必其一非苗黨乎該道將來進兵然後知似苗非苗

批牘卷三

三

分別良莠極不易易也所請預禁之處應毋庸議
統帶貞右等營成參將大吉稟復固始縣紳民列控暨呈
明請病假緣由

昨據該將呈報扶疾拔營與蔣道會師前進能就此約束部卒
奮勉圖功挽回聲名則前此飭查之案亦未嘗不可予以自新
量從寬減本部堂訪察諸將之聲望多采諸部卒與百姓之口
該將果爲部卒所畏愛百姓所感頌本部堂豈能故爲苛求如
其反是亦豈能故爲寬縱爲榮爲辱在該將之自取之不必預
先瀆陳也

正陽由

苗逆就戮賊膽皆寒穎上踞逆獻城出降自是意中之事若再將正陽收復則淮甸可告肅清此時壽州之賊已降正陽之賊斷難孤立大兵一至亦必相率獻城也其尤爲出力員弁兵練俟正陽收復後彙案核獎此次平苗之功以僧郟及唐富李陳諸軍爲最我湘軍未當前敵未經大戰當郟帥未誅苗逆之先該軍等前卻次且屢催不進將來祇能酌保數人不能開單多保也

代辦精捷全軍事務陳道鳴志稟統憲江軍門病故懇

奏請賜卹由

批牘卷三

四

江軍門自咸豐三年以後日在兵閒殊勳偉績照耀於江湖鄂皖粵西等省不可殫數此次千里赴援暑雨載途喘息未定卽進剿彭湖之賊病勇未愈又馳解青陽之圍戰功最多勞苦最甚昨者因病過皖相見悽惻然猶冀天佑勞臣傷病雖深或者壽命不促茲聞來稟竟於初四日舟抵吳城時病故悲悼曷已查江軍門以書生從戎歷保文職洊至監司大員又蒙 恩擢署貴州巡撫茲於立功後積勞病故應奏請 特恩仍照文職例賜卹以慰忠魂并奏明照例入城治喪

管理湘中右等營毛道有銘稟收復正陽關由

此次會復正陽關城苗黨係畏僧郟之威非畏楚軍之進攻也

我軍前此既不能保全後此株守五箇月不能進剿壽正穎
一次以掣懷蒙之賊勢直至僧邨南下蒙城解圍苗逆授首乃
始進攻穎正淮上諸軍必譏我軍危時全不動手安時乃來爭
功矣所有正陽一關該軍等不必畱營戍守以避爭功之嫌

批朱鎮軍十一月十三日稟

祁門既已收復徽休兩城尙可堅守此大局之幸也余前擬令
貴軍棄旌不守而退守徽休今貴軍米糧子藥既可支二三箇
月則旌城斷不可輕棄宜仍竭力堅守至囑至囑現在鮑軍糧
路已通若年內能將甯郡之賊打退則蕪湖魯港之船可由涇
縣直運至三溪旌德矣較之由徽祁嶺內運出難易迥殊也王

批牘卷三

五

道鈴峯一軍現今其駐紮祁門但該軍非本部堂所統倘左帥
欲調至景鎮婺源等處則貴軍宜退徽州唐軍宜退休甯各派
二營共守休甯若王鈴峯尙在祁門則貴軍斷不可輕動也涇
旌兩縣交界之區貴軍宜約易鎮吳守有事則會剿無事則會
哨庶旌軍不甚孤寂賊若竄江西本部堂已奏調江味根一軍
來剿沈帥亦派韓軍五千人左帥亦派蔣軍萬人會剿皆商定
矣應無大礙

統帶吉中果字確字營彭道椿年稟報開用關防日期由
古來名將帥亦多出於文弱書生功之成與否雖不敢預必要
之潔清自矢則眾不敢侮嚴明馭下則兵不敢玩此則有志之

士可以勉力爲之立竿見影者也聖賢豪傑豈有種子大半皆
銖積寸累漸作而漸進漸似而漸成耳

統帶精毅營席道寶田稟陳道鈔奉批示擬緩期前赴江

西省垣由

該道因陳道進省防務無人照料暫緩離營具見公爾忘私顧
全大局頃接蘇撫部院函稱僞忠王將由甯國縣竄至玉山廣
信上犯江西等語查咸豐十年冬忠酋上竄江西係由甯國縣
而出昌化淳安開化以達於玉山十一年正月初旬連圍玉山
廣豐廣信三城然後內竄腹地圍撫建陷吉安瑞州義甯遂入
鄂省連破七城仍回江西新昌瑞州豐城撫州瀘溪鉛山以抵

批牘卷三

六

浙江而陷杭州其時該逆雖未能解安慶之圍而數月之內長
驅五千餘里攻陷二十餘城擄人數十萬財物無算是僞忠王
生平最快意之事此次自蘇州踉蹌奔出失意之秋思欲重尋
此路上犯江西兩湖實屬賊計應有之舉亦官軍最可慮之端
若昌化淳開一路難以闖過則仍從旌德太石上犯建德饒景
亦屬意中之事仰該道妥爲防範并將石門洋塘通景鎮之路
無分大道窄徑一一踰勘繪圖通知各軍以備互相援應仍以
一分齋呈本部堂備查

批梅守錦源十一月二十二日稟

頃見石隸紳耆致在省諸紳書深怨朱軍之騷擾其略云古目

投誠民皆以爲有家可歸種作有期不意被朱軍駐紮兵勇將房屋拆毀以作柴薪歸民捉去爲伊搬運所有店鋪被兵勇輩佔居買賣更有夫役人等借名砍伐竹木而實搜取室物我邑城鄉內外房屋完全者百無一二如此橫行以致歸民有官兵不若長毛之嘆云云

以上皆信中語

雲巖不在營中何以各營官全不管束致紳民怨恨若此究竟何營規矩最鬆拆屋者何哨最甚仰一面查明懲辦一面開單稟明吾輩帶兵若不從愛民二字上用功則造孽大矣千萬懍懍

唐鎮義訓稟奉遣撤良字前右兩營擬就兩營挑選精銳別爲一營請示遵行由

批牘卷三

七

就良字兩營中挑五百人爲一營哨官什長均由湘軍挑放尙屬可行仰卽照所議辦理如勇丁實多精壯者卽多挑一哨亦無不可但只可令之守城不可派出野戰此係因貴鎮兵力太薄故勉強允其所請至於各處敗兵往往一收再收屢次誤事論者皆曰不收之當勇則彼將從賊矣余向不以此說爲然因他從賊而一概收之入伍以有用之餉銀養極壞之敗卒天下之遊勇潰兵可勝收哉貴鎮此次可偶一爲之以後切不可聽此等議論金陵十年之敗鮑軍近日之弱皆由收勇時全不謹慎耳

統領老湘營易鎮開俊稟遵示整肅營規由

前此涇縣捉夫搶擄諸案業經梟示數人亦殺一警百之道惟一味撇清謂與貴鎮營內勇夫無涉究未免信心太過蓋統轄既多必有耳目難周號令不行之處本部堂治軍多年刻刻嚴禁騷擾而每遇人告我部下擾民之案不敢護短以拒人言不敢信我兵之皆良不敢疑告者之皆誣也貴鎮於此類重案事前既失於防範事後袒庇部曲堅拒人言該軍弁勇從此益無忌憚官民從此益不敢以實言相告矣欲輿情之不怨其可得乎前此貴鎮初駐涇時發粥搭棚諸惠政涇民靡不歌誦本部堂每爲之嘉慰無已當此營規初壞聲名驟減之際果能嚴於自治實力整頓營規保全舊日聲名在百姓最有公道又將化怨詈爲歌誦矣不然以愛民始以擾民終先後判若兩人非本部堂拳拳委任之意也凜之凜之至囑至囑

暫理依仁等營事務吳守廷華稟請將依仁營另行委員

接帶併歸張道統轄由

下游蘇州雖克而忠侍兩酋尙聚句容溧陽一帶堵逆黃文金亦踞湖州一路屢據稱報均有由皖入江之議卽將來金陵杭州并復羣賊必圖紛紛上竄該守所部駐守祁門係江西門戶亦爲嶺內外第一關鍵防務正須加嚴仰仍遵照前批假滿趕卽回營并飭吳從九先行來皖銷假凡作一事無論艱險平易但須埋頭做去掘井不已終有及泉之日該守於軍務閱歷已

深儘可鍊成將材何不猛著一鞭期於及泉而止若觀望猶豫半途而廢不特於兵事無所成卽他事亦自盡矣吳從九藉詞不出似有缺望於保舉者尤爲不可

水師副

前營 萬鎮 化林 李鎮 濟清

稟兩營哨船奉畱紮防緣由

來緘具悉貴鎮等所帶兩營征戰十年屢立功績長江所以一律肅清者全賴楊軍門統率貴營等苦戰苦守尤賴官閣部堂嚴撫部院不分畛域以鄂臺之餉養水陸之軍勦皖吳之賊今金陵賊勢日蹙可望克復自應畱貴兩營等竟此一簣之功以慰多年之望在弁勇辛苦累年必不因此際餉絀而遽至譁潰在鄂臺供億五省必不因多此二營而遽思裁撤仰卽照舊當

批牘卷三

九

差巡緝長江搶匪以安商旅應領月餉油燭等項候咨商官閣部堂嚴撫部院照舊支發如鄂臺刻下窘絀本部堂當飭皖臺酌量支發作爲協餉開報鄂皖兩臺向來本不分家也至營中一切仍循舊制無須更換關防另立名目嚴鎮定國據稱抱病甚深所部正左營資格較淺應卽裁撤以副楊軍門節省餉需之意卽爲鄂臺計之三營同撤應補之欠餉太多反不如畱二撤一易於料理耳

批唐鎮十二月二十三 日稟

一路察看甚爲詳細新正赴甯國縣一帶周歷履勘查明金毛二軍究應駐休甯作活兵乎抑應進剿廣德作爲攻取之兵乎

仰細心查訪博詢熟識形勢者詳明呈覆卽進攻廣德或取道歙績或取道石太何者較便一併查復

同治三年甲子歲正月起安慶行轅

統帶精毅營席道寶田稟復卑營裨將各情另單稟請飭令吳中書紹烈前來勦辦營務由

該營裨將邊成阮可資臂助金張等六人又皆敢戰之士是尙不爲乏材庶人之家數語深得反己自強之道自古聖賢立德豪傑立功成不成初不敢預必只是日就月將盡其在我孔子所謂誰敢侮孟子所謂強爲善皆此義也游擊之師有二難本部堂亦深以爲慮無術補救王鎮永章旣可獨當一面應仍畱

批牘卷三

十

湘省以備桑梓緩急之需至請此間選可恃之將殊難其人在皖南各統將中以現守甯國之劉鎮松山爲最日內又當派毛道有銘金道國琛率六千人南渡爲徽池饒州之活兵此三將皆可與該軍共事不審果贖人意否吳中書紹烈候卽飭赴該營贊助一切

李軍門世忠稟移眷住省暨陳鎮自明所部發歸何處請示由

前與貴軍門疊次函牘商定三月內將五城兵勇全數遣散四月初親來安慶晤商一次卽赴本任均經本部堂據實奏明在案頃接來緘又不親來安慶而欲先赴舊縣一變前約殊失本

部堂誠信相接之意其實舊縣靈柩儘可派人扶送回籍何必親往杭州嘉興均已克復松江去賊甚遠又有本部堂爲之主持何虞謗議俟到任數月後呈請開缺或退居原籍或移寓省城均由貴軍門自便此時不必預計也今與貴軍門約定三條一則三月內將勇丁遣撤完竣一則四月半以前親來安慶謁見一則只准赴本任及固始兩處不准畱戀舊縣把持利權致各部曲散而復聚生出多少葛藤此三條如不一一辦到不待他人參劾本部堂定行奏參治罪貴部下之名散而實未散者皇上亦必派兵勦辦也望善自保全勿貽後悔陳鎮自明所帶勇丁二千人亦限於三月內拔赴南岸之池州駐紮聽候調遣李副將顯發准給咨飭赴漕中協本任不准仍帶馬隊親兵卽一併遣散可也

統領平江營張道岳齡稟編定營哨分派管帶并酌擬營規呈覽由

據稟并另摺均已閱悉哨隊不整齊薪糧不畫一爲行軍之大忌經該道逐加整頓壁壘一新以後當可日起有功矣甚慰甚慰細閱營規各條用心極周條理極密具見實事求是惟節目太繁恐各哨勇不能徧記其末簡明八條則一字一珠切要之至本部堂亦曾刻有勸誠淺語十六條茲附去二本以備參核惜近日諸將不能恪遵約束知之十不能行之一環顧部下竟

少可恃之營望該道努力振作再接再厲以掃殘氛

記名總兵江忠朝稟由楚入江赴皖由

浙省後股之賊已由婺源竄入江境該營已經撫部院調令折回樂平一帶迎頭截剿軍事方急仰該鎮卽赴行營力加振整斷不可率爾來皖有荒堵剿要務至囑該族自忠烈公以下人皆以忠勇著績疆場該鎮爲諸昆季所推重物望久孚自足表率各營仰認真整頓任勞任怨無墮望族令名

陳鎮自明稟所部忠樸四營現覓紮池州之清溪到防日期由

發去營制營規各二本仰卽詳細閱看營制係昔年所定近來

批牘卷三

十一

亦有不盡合者卽如湘營每棚十一人鮑軍每棚十人湘營每勇月餉四兩二錢鮑軍每勇月餉四兩建字營月發三兩六錢各營尙有不及三兩者營規係昔年所定近亦有不盡遵者惟騷擾百姓係本部堂平日痛惡之事該總兵務須嚴加約束細心告誡無壞李軍門之聲名無負本部堂之教訓另發去勸誡淺語二本其中有四條專教各營將領該鎮常常請人講解勉作名將勉作好官望之慎之

統領精捷全軍江總兵忠朝稟收復弋陽後擊賊情形并籌畫進止緣由

弋陽敗賊萬有餘眾已延至上清宮是撫建情形較緊前聞繼

果營馳回撫郡不知果已趕到力保腹地否績溪一股於十二三四等日在歛休境內經徽軍擊散所剩餘匪不過二千器械無多不足深慮也前營左翼兩營候咨明左部堂飭派來江歸於該部以厚兵力江前軍門臨危之際與席臬司和好如初誼若昆弟本部堂所深知精捷營諸將弁之不服席臬司亦本部堂所稔聞也此時若遽求其合必且參商日甚痕迹日深不如各打一路精捷本多能戰之才該鎮與陳鄧兩道以好言獎慰之以謗議激勵之用其善戰之長戒其擾民之短不過一二月勳績卓著遠近皆無閒言則精毅營之違言亦不辨而自熄矣席道本無成心將來仍有可合之道也此時精捷諸將在力求和睦力禁騷擾苟能自強卽聖人所謂誰敢侮之矣

批牘卷三

三

湘前營營務處梅守錦源稟奉札查復湘前各營勇夫在青陽騷擾百姓及朱鎮品隆上年招降古隆賢并無受賄各情由

閱稟覆各情則勇丁強耕熟田奪取農器封擄重載船隻摘茶砍傷女人考試時打傷童生均係確有之事果係何營何哨勇丁仰卽查明稟復一面從嚴懲治并稟請將該營哨分別懲究毋庸再札青陽縣另查矣所查朱鎮兩事亦自有理然物必先腐而後蟲生該守與朱鎮交誼甚篤而本部堂所聞亦係與朱鎮交密者之言該守必須互相勸勉以勵廉隅而迴清議天下

滔滔皆沈迷於利字之中惟賴文武大員有長人之責者矢清
潔於屋漏幽獨之地少取一分則蘇一分之民困亦卽挽一分
之天心此則本部堂所願與該守輩兢兢自勵者也

同治三年甲子歲八月起金陵督轅

管帶義從營黃令元齡賀稟

前接南中來函述及該令整飭營規事無不舉與昔年所聞血
性過人勇於爲義正相符合欣慰無已發去勸誠淺語二本藉
資循省人才以獎借而出國器以歷練而成願該令勉爲良才
儲爲大器尤願與部曲互相警惕亦以良才大器勛人則暗中
之所成就者不少矣

八批牘卷三

十四

鮑提督超稟蒙允以江皖肅清卽爲 奏請寬假感謝鴻

慈由

貴軍門忠孝性成戰功卓著屢蒙 寵賚殊恩罕有倫匹恭

繹六月廿九日 諭旨此次雖已加恩仍俟江皖肅清同膺

上賞可見 朝廷相信有素於貴軍門多年勞苦忠勳一一注

記初不藉另有薦章也尙望誠以愛民謙以接物公以馭下庶

幾集思廣益無愧名將之風勉之禱之

鮑爵帥超呈報 咨復閩撫業已交卸營務往舟中養病由

貴軍門請假歸葬本部堂業於本月十二日據情代奏鈔摺咨

會欽奉 諭旨賞假兩月假滿後由川募勇起程出關勦辦

回匪并令宋鎮國永婁鎮雲慶分領所部赴閩擊賊當經恭錄咨達冰案矣此次貴軍門疊膺

懋賞錫爵酬庸并勛以揚

威萬里與前賢楊忠武比例朝廷禮遇之隆有加無已一俟假滿希卽帶隊西行以副國家倚畀之深而立人臣非常之績馮鎮標現赴涼州本任貴軍門正可奏帶隨往也

江西撫科候選縣丞劉忠堦瀝陳時事稟

閱此具見血性過人然語太激切便涉客氣凡關係君親之事著不得半點客氣古來忠臣孝子多半是處逆境磨鍊出來的若一片順境有何難處若不遏抑客氣一念之差大不幸則爲李懷光小不幸則爲勝克帥可戒也爾能善保血性力除客氣將來必有成就吾亦不憚於常教耳

批牘卷三

五

管帶義從營黃令元齡稟奉檄馳抵天柱縣辦理剿撫黔

苗事宜由

前聞該令治軍時時以愛民爲念本部堂嘗以國器目之稟中所稱極意拊綏非僅兵威所能了事尤見慈祥愷惻溢於言表爲名將爲良吏亦惟持此心以加勉天下絕大事業多從不忍二字做出天下無窮進境多從不自足三字做出願共勛焉

鮑爵帥超稟單三件

前貴爵軍門陳情歸葬來文請假一年本部堂奏請給假六箇月奉旨僅准兩月誠以甘省回匪日熾朝廷之眷顧西

陞至切而急盼貴爵軍門之率隊出關又至殷縱使假期過促
營葬未能成事亦祇可臨時咨請駱督部堂奏懇量爲展假此
時斷未可瀆請也舊部兵勇得力將弁原奉

諭旨准其酌

量奏調隨帶同行餘交宋婁兩鎮分領赴閩若遽調至二十五
六營之多則赴閩者所餘無幾亦難形諸奏牘本部堂代爲酌
度應請貴爵軍門帶譚勝達新五營唐仁廉一營親兵一營合
計已四千人矣此外張遇春洪容海陳炳文楊忠等各軍中酌
帶二千人或帶其將而遣其勇總之由江西帶往者以六千人
爲率由四川續調續募者以四千人爲率萬人西征足以橫行
塞外斷不可以再多再多則運糧更難矣除帶六千人至回疆

批牘卷三

夫

外畱江西者尚有萬餘人宋婁二鎮皆實缺總兵得力統將二
人中須畱一人在江西統帶援閩之師遵

旨悉歸左督部

堂節制其口糧係由江西籌發仍須遵照本部堂所奏諄屬宋
婁暨畱江諸將聽候沈撫部院調度卽貴爵軍門此次萬里出
關所帶兵勇所需行糧亦須一一與沈撫部院往返函商俟商
定後一面由沈撫部院具奏迅速啟程回蜀一面咨復本部堂
具奏互相印證以慰

聖懷廣武左軍雖稱得力然現在陳

臬司部下應由貴爵軍門函商該司咨商湖南撫部院辦理至
川省調募兵勇亦請貴爵軍門就近與駱督部堂商辦新營所
需糧餉軍裝應卽由川省籌撥貴軍在江西克復各城及許灣

大捷甯都解圍應併作一案保獎應就近咨明沈撫部院開單出奏較爲簡捷如必欲由本部堂核明奏獎則每百人中不得過十八人也再 諭旨不令貴爵軍門帶全部西征而令在四川募勇蓋深知兩湖之勇不慣麪食不耐嚴寒與甘肅關外風氣不同水土不服故召募川勇爲其稍與西路相近也貴軍門回蜀調募兵勇尙不宜用川東之人宜用川北保甯龍安兩府之人由龍安而至甘肅之階州古所謂陰平道也由保甯昭化而至階州近日各陸路通行之道也保龍二府兵勇與甘肅風氣不甚相遠若兩湖兵勇必須帶至階州稍與休息察其能服水土與否倘階州已不相安則不宜帶之出關但宜遵

批牘卷三

七

旨換募川勇矣風土人情遠近異宜此不可不知者也又如靈軍馬隊本係貴爵軍門與各營官捐出截曠銀兩購買之馬西北又係馬隊見長之地理應全帶出關惟查由江西湖北而入三峽又由夔州重慶而至保甯以上達甘肅階州水路約六七千里換船數次節節上水灘河萬不能載馬以行若人舟行而馬陸行則馳驅太遠弊者必多且甘肅新疆之馬甲於天下既多且賤不若酌帶操熟之馬勇并帶買馬之銀二萬兩俟入甘後多購良馬最易成軍其靈營現有馬匹仍畱江西歸宋婁二鎮管轄庶爲兩便如貴爵軍門以爲可行則購馬之二萬金可由本部堂籌解甘省也

同治四年乙丑歲五月起北征行轅

統領銘字營劉軍門銘傳稟兩奉傳諭催赴畿疆等情

來牘已悉本部堂於初一日奏明貴軍門所部不宜遽入直隸宜剿賊於黃河以南當經鈔摺咨會在案惟現值僧邸陣亡

局面又變

宵旰憂厯迥異尋常二十九日及初一日廷

寄均令貴軍門繞赴劉長佑軍營貴軍門若不出江南之境恐干嚴譴若竟赴劉部堂軍營則亦有數不便者一則賊未渡黃而銘軍渡黃反置勁旅於無用之地二則鄆城荷阿等邑黃河南岸一片寇氛銘營孤軍深入若不掃盡羣賊焉能衝過北岸三則米糧礮械均未籌畫運送之法餉銀亦無著落淮勇渡黃飲食器用不便必難得力本部堂奉

批牘卷三

六

旨前赴山東督剿本

月部署啟行擬在濟甯州駐紮銘軍目下不能遽赴直隸亦當先赴山東境內應在魚臺滕縣兩邑所屬於運河附近之處擇要駐紮盛字營應紮於徐州府樹字營現紮韓庄聞與銘營可遙爲犄角米糧火器由運河轉輸亦尙方便若鄆曹等處之賊前來撲營貴軍穩紮穩打當可無虞俟本部堂到韓庄聞後再行酌量調度

婁鎮雲慶稟懇迅咨江西撥濟大批餉項安慰飢噪各勇

由

此次貴軍自上杭回江贛州官紳始則閉城把卡繼又請拔赴

信豐或有鑒於金口之變人情不無疑懼得貴鎮拊循約束當亦釋然於心昨據贛南王道及王黎二守會稟有婁軍魚貫而進相安無事號令嚴明等語是以不疑該軍之或有他變矣本部堂極知上杭譁諫迫於飢餓屢發函牘商之江省速籌大批餉米並出示剴切曉諭到江後先行休息兩箇月兩月後如願遣散則准發欠餉一半餘赴台守領一半如不願遣散則調至各處防勦不知該軍已見過此示否貴鎮務須曲爲開導先安眾心靈營功績甚大勞苦甚久助我成此大功本部堂斷不負之必當全清欠餉不少絲毫無論在江南在山東貴鎮儘可堅駐贛州稟請由我作主也

批牘卷三

九

婁鎮雲慶靈營受病亟宜遣撤各情

來緘所稱靈營受病之處及亟宜遣撤之處語語透澈切中情弊本部堂前次出示剴切曉諭并於十一日批答貴鎮函稟中謂回江後先行休息兩箇月俟兩月後如願遣散則准發欠餉一半餘一半赴台守領如不願遣散則調至各處防勦本部堂原無專主不撤之議也至蕭以德等所買口馬本部堂現擬奏明改調山東應用該軍舊存馬隊空額已多將來不難盡遣所請將各營步隊分調三處以殺其勢辦法亦善惟本部堂之意總欲將靈營極好聲名爭回不特金口勇丁叛潰之名必須設法爭回卽上杭勇丁飢噪之名亦須立志挽回金口一起雖已

叛潰但使見我告示有一二千人歸誠就撫就把名聲爭回一半了上杭一起若目下全行遣散下場究不體面只好於休息兩月之後先將春字五營遣散此外正五營副五營親兵禮字馬隊等營暫不宜遣待鮑爵軍門到後統帶立功或再打幾箇勝仗克幾箇城池不特飢噪之名可以挽回無迹卽金口叛潰之名也代替他遮蓋幾分了卽本部堂與鮑爵軍門之體面也救全了或卽畱江西勦賊或調至山東隨征均無不可候咨商鮑爵軍門辦理

統領銘字營劉軍門銘傳稟分派各軍移紮鉅野由

陳國瑞專好私鬪尋衅搶掠是其故智遠近軍民無不知之本

批牘卷三

十

部堂帶兵多年從無偏袒部下之事亦斷不宥令所部將士受人欺壓貴軍門此時務當一意辦賊勿以他事爲念賊可擊則擊之不宜因他軍牽掣坐失機宜賊不可擊則不擊不宜因他處催約遂爾浪戰所有應行陳奏之事本部堂自當歷敘前後各情節剴切入告 朝廷虛衷採納公道自必大明決不使貴軍門稍受委屈也

朱鎮品隆稟石埭四營勇丁求餉安撫大略情形

該軍七營分駐青陽石埭糧臺所發月餉多寡適均卽欠餉亦不相上下此次移防甯國何以石埭四營獨有索餉閉城之事顯係該營官洪總兵等平時領到餉銀暗中肥己或糧臺月發

六七成而該營官私收八九成無以悅服眾心及至勇丁藉端鬧餉束手無策實屬可恨貴鎮先將洪陶胡三總兵撤委所辦甚是副左營喻總兵據稱稍得兵心准其暫留以資約束至所謂先發五箇月滿餉之處若統該軍七營言之糧臺無此巨款若專指石埭四營言之則滋事者獨得巨餉何以對不滋事之青陽三營耶况該軍餉項統計每月可得六成其餘所欠之餉本部堂自克復金陵後裁撤五萬餘人無不找清欠餉不少絲毫此各營所共見共聞將來遣撤該軍豈能獨異平日欠餉愈大臨撤時找發愈多每勇可攜百金數十金回家何負於各勇丁乃必於移營之時勒索積欠其中必有一二刁健之人煽惑主使務須確切查拏卽行正法以示炯戒并密查各營官平日發餉不公之處稟請嚴辦方足儆刁風而安眾志

潘道鼎新稟陳言北方用兵宜用車戰各情

所論北方形勢主客機宜悉中竅要惟車戰一事殊未易言昔人如房琯行之不善而敗李忠定請以車制頌京東西製造教閱而南渡諸戰未聞以車制勝者臧南塘練兵實紀孫高陽車戰百八言之詳矣而二公守邊亦不聞車戰之益卽近時胡文忠公欲募二千人爲三營每營創造小車二十架每架置礮一尊謂沿江征剿大有奇境亦卒無成本部堂到徐後擬製造車輛購養牛馬以利糧運若以之臨敵終患推挽不靈未敢嘗試

也至用兵以得人心爲第一義非獨今日勦擒爲然古來平寇亂者莫不皆然也

統帶湘皖馬步等營蔣道凝學稟各營索餉情形三件

疊接五月二十一二十四二十五日三次稟函均悉該道所部利左八營因餉譁謀逕赴河西之王家河駐紮待餉經該道飭弁曉諭雖不至遽萌叛志而情形岌岌可以想見實深馳系自金口霆營潰亂後各營紛紛效尤目前畱防皖南各軍索餉大譁毆傷官長平日本足資食用臨撤又全清欠餉乃亦譁噪生事尤出情理之外本部堂思有以懲創之該道一軍自去年以來奔馳數千里積勞旣甚欠餉尤多比之徽軍安坐而餉稍優

批牘卷三

五

者相去天淵譁索尙有可原本部堂奉命勦擒於本月初八日行抵清江行營攜銀無多近地又無可籌撥愛莫能助遠莫能致仰該道竭力維持若竟學金口叛卒之例則湘勇聲名掃地而該道亦無顏自立矣此批到日不知該軍果決裂否焦灼之至

盛字營周鎮盛波稟蒙宿實在情形擬俟軍裝到齊滾營

前進以勦爲防直搗雒河老巢由

擒馬逼近宿州賊之布勢甚遠該軍尙未到齊自難分隊前進仰卽穩紮穩守馬賊如近城卽痛勦之或先搗龍山石弓山老巢以攻其所必救亦足以分掣賊勢使不得專力於雒河劉軍

門銘字全軍已於十八日拔營俟有到徐州確信該鎮一面滾營前進援解雒河之圍劉軍門一面續進爲該鎮後護之師一面分兵擊龍山石弓山以保宿州要區如賊在濉溪口一路則劉軍門親率大隊緊接該軍之後分兵往擊濉溪可也本部堂於二十二日行抵盱眙到臨淮後酌量調度一切

浙江處州鎮陳國瑞稟暫駐歸德並餉項軍火如何籌措

該鎮所部業奉 諭旨飭赴歸德軍火器械自應在河南糧

臺支領至八千人之餉爲數甚鉅斷非每月二萬所能敷用况二萬金之協餉尙屬不甚可靠古諺有云兵馬未動糧草先行

批牘卷三

三

此萬不可易之理若以八千之眾全無確實之餉將來因飢生變禍端不測本部堂所部皖南各軍近日因餉絀鬧事紛紛閉城毆官居民逃避焦灼之至該鎮宜就近與豫撫部院熟商若餉項極絀固宜及早遣撤卽餉項稍優該鎮濫收敗兵游勇亦宜遣撤大半或酌留二三千人庶免弗戢自焚之患不可貪部卒眾盛之名而忘飢軍殃民之慮也

再前於閏五月初間連接該鎮二稟一件言自嘉祥解圍回至濟甯勇丁與劉軍門部下械鬪一件言陳振邦招勇未到不能迅速拔營本部堂所以未遽批答者因心中有千言萬語欲與該鎮說明又恐該鎮不好聽逆耳之言是以遲遲未發茲該鎮

稟商餉銀軍械等事急欲立功報國而恐諸事掣肘其志亦可憫可敬特將本部堂平日所聞之言與玉成該鎮之意層層熟籌而敬告之本部堂在安慶金陵時但聞人言該鎮劣迹甚多此次經過淮揚清江鳳陽處處留心察訪大約毀該鎮者十之七譽該鎮者十之三其毀者則謂該鎮忘恩負義黃鎮開榜於該鎮有收養之恩袁帥欲拏該鎮正法黃鎮夫婦極力營救得保一命該鎮不以為德反以為仇又謂該鎮性好私鬪在臨淮與袁帥部將屢開明仗在壽州與李世忠部下開明仗殺死朱杜二提督旋在正陽關捆縛李顯安搶鹽數萬包在汜水時因與米船口角小爭特至湖西調隊二千與米商開明仗知縣

批牘卷三

五

叩頭苦求始宥罷兵又謂該鎮騷擾百姓凌虐州縣往往苛派州縣代辦軍裝號衣等件在泗州毆辱知州潘司張光第同在一處躲避床下旋即告病在高郵勒索水腳所部鬧至內署搶掠合署眷屬跳牆逃避知州叩頭請罪乃息又謂該鎮吸食鴉片喜怒無常左右拂意動輒處死并有因一麻油餅殺廚子之事藐視各路將帥信口譏評每每梗令不聽調度動稱我將造反郭寶昌之告變事非無因本年四月曹南之敗與郭寶昌同一不救主帥同罪異罰屢論不平凡此皆言該鎮之劣迹者也其譽者則謂該鎮驍勇絕倫清江白蓮池蒙城之役皆能以少勝眾臨陣決謀多中機宜又謂該鎮至性過人聞人談古來忠

臣孝子傾聽不倦常喜親近名儒講誦孟子又謂該鎮素不好色亦不甚貪財常有出世修行棄官爲僧之志凡此皆言該鎮之長處也譽該鎮者如漕督吳帥河南蘇藩司寶應王編修凱泰山陽丁封君晏靈璧張編修錫嶸皆不妄言之君子毀該鎮者其人尤多亦皆不妄言之君子今不復悉舉其名本部堂細察羣言憐該鎮本有可爲名將之質而爲習俗所壞若再不加猛省將來身敗名裂而不自覺今爲該鎮痛下針砭告戒三事一曰不擾民二曰不私鬪三曰不梗令凡設官所以養民用兵所以衛民官吏不愛民是民蠹也兵將不愛民是民賊也近日州縣多與帶兵官不睦州縣雖未必皆賢然帶兵者旣欲愛

民不得不兼愛州縣若苛派州縣供應柴草夫馬則州縣攤派各鄉村而百姓受害矣百姓被兵勇欺壓訴於州縣州縣轉訴於軍營若帶兵者輕視州縣而不爲民申冤則百姓又受害矣本部堂統兵十年深知愛民之道必先顧惜州縣就一家比之皇上譬如父母帶兵大員譬如管事之子百姓譬如幼孩州縣譬如乳抱幼孩之僕媪若日日鞭撻僕媪何以保幼孩何以慰父母乎聞該鎮亦無仇視斯民之心但素好苛派州縣州縣轉而派民又好凌虐弁兵弁兵轉而虐民焉得不怨聲載道自今以後當痛戒之昔楊素百戰百勝官至宰相朱溫百戰百勝位至天子然二人皆慘殺軍士殘害百姓千古罵之如猶如

夫關帝岳王爭城奪地之功甚少然二人皆忠主愛民千古敬之如天如神願該鎮以此爲法以彼爲戒念念不忘百姓必有鬼神祐助此不擾民之說也至於私相鬪爭乃匹夫之小忿豈有大將而屑爲之本部堂二年以前卽聞該鎮有性好私鬪之名此名一出人人皆懷疑而預防之閏五月十九日之事銘字營先破長溝已居圩內該鎮之隊後入圩內因搶奪洋鎗口角爭鬪銘營殺傷該隊部卒甚多劉軍門喝之而不能止固由倉猝氣忿所致亦由該鎮平日好鬪之名有以召之耳聞該鎮好讀孟子養氣之章須知孟子之養氣行有不慊則餒曾子之大勇自反不縮則惴縮者直也慊者足也惴則不壯餒則不强蓋

批牘卷三

美

必理直而後氣壯必理足而後自强長溝起衅之時其初則該鎮理曲其後則銘營太甚該鎮若再圖私鬪以洩此忿則禍在一身而患在大局若圖立大功成大名以雪此恥則弱在一時而強在千秋昔韓信受胯下之辱厥後功成身貴召辱己者而官之是豪傑之舉動也郭汾陽之祖墳被人發掘引咎自責而不追究是名臣之度量也該鎮受軟禁之辱遠不如胯下及掘墳之甚宜效韓公郭公之所爲坦然置之不特不報復銘營並且約束部下以後永遠不與他營鬪爭能忍小忿乃成大勳此戒私鬪之說也 國家定制以兵權付之封疆將帥而提督概

歸其節制相沿二百餘年矣封疆將帥雖未必皆賢然文武咸

敬而尊之所以尊

朝命也該鎮好攻人短譏評各路將帥

亦有傷於大體當此寇亂未平全仗統兵大員心存敬畏上則畏君下則畏民中則畏尊長畏清議庶幾世亂而紀綱不亂今該鎮虐使其下氣凌其上一似此心毫無畏憚者殆非載福之道凡貧家之子自恃其竭力養親而不知敬畏則孔子比之於犬馬亂世之臣自恃其打仗立功而不知敬畏則陷於大戾而不知嗣後該鎮奉檄征調務須恪恭聽命凡添募勇丁支應糧餉均須稟命而行不可擅自專主漸漸養成名將之氣量挽回舊日之惡名此不梗令之說也以上三者該鎮如能細心領會則俟軍務稍鬆前來稟見本部堂於覲面時更當諄切言之務

批牘卷三

三

令有益於該鎮有益於時局玉成一名將亦本部堂之一功也若該鎮不能細心領會亦有數事當勒令遵從者第一條八千勇數必須大為裁減極多不准過三千人免致雜收游勇飢潰生變第二條該軍與淮勇及英康等軍一年之內不准同札一處第三條該鎮官衙宜去

欽差字樣各省協餉均歸河南

糧臺轉發不准別立門戶獨樹一幟仰該鎮逐條稟復以憑詳晰具奏至於所述毀譽之言孰真孰偽亦仰該鎮逐條稟復其毀言之偽者儘可剖辨真者亦可承認大丈夫光明磊落何所容其遮掩其譽言之真者守之而加勉偽者辭之而不居保天生謀勇兼優之本質改後來傲虐自是之惡習於該鎮有厚望

統領銘字營劉軍門銘傳稟連日進剿擒逆情形

貴軍自徐州過行力破崔家樓孫家寨等處賊眾聞風膽寒據周鎮稟報雒河左右之賊均於初三日向西北一路遁去雖未大受懲創而英藩司一軍保全無恙淮軍先聲奪人解此重圍深堪嘉慰現在賊蹤所向尚無準信想已西竄日遠矣貴軍應在宿蒙亳一帶擇一柴草較多轉運稍便之處駐紮休息廣羅紳耆訪問三屬著名擒首勒令該圩交出如不交出即將該圩勦洗仍用打孫家寨之法其交出者則斬其匪首而餘眾概予不問其圩首素非稔惡而其下有甘心為匪者則令圩首捆獻

天

批牘卷三

一二人斬之而仍免圩首之罪該軍冒暑奔馳辛苦太久本應休息一兩月以養士氣趁此閒暇之時清查三屬圩寨擒首殺一擒即除一害清一圩即少一患此是治擒之根本臨陣擒斬百人不如清圩時斬數人之得當也惟清查圩寨其中有許多條目訪問紳耆亦須優以禮貌給以薪水又恐有仇扳袒庇等弊尚須定一章程出一告示希貴軍門於賊竄已遠之後輕騎前來臨淮面商一切

王鎮可陞安稟一件

現在賊蹤雖遠而安慶之防不可少弛仰該鎮刻刻訓練如臨大敵愛重百姓如待家人帶兵者知愛民之為先務萬善畢集

矣

臨淮恩貢生郗懷仁等稟懇嚴禁營勇下鄉騷擾田

臨淮各鄉疊遭兵燹遠近數百里內無樹不伐無山不童瞻眺之餘爲之心惻本部堂帶兵十餘年刻刻以不擾民三字訓誠將士駐紮之地從不准向百姓需索分毫此次奉 旨勦擒

奏明於各省要地分置勁兵臨淮爲皖北重鎮業已派定大兵爲久駐之地目下所用柴草皆出錢購買若偶用樹株亦必酌給民價須知百姓有百姓的苦處兵勇亦有兵勇的苦處彼此相量便可相安無事本部堂派靈壁張編修爲臨淮營務處該編修愛惜桑梓惟恐百姓喫虧將來兵民交涉之事必可剖斷公允該貢生等讀書明理亦須勸諭附近居民不可動輒與兵勇爲難但得大兵畱駐此地可以永無捻患百姓耕作如常自有蘇息之日也

批牘卷三

无

署安徽臬司何李稟陳管見數端伏候裁擇由

細聞來稟大要謂皖北捻患正盛皖南兵禍方興兵禍實在腹心捻患警猶肢體具見該司等通籌大局智慮周詳良爲佩慰自靈營金口之變各軍紛紛效尤婁軍謀於上杭韓軍謀於會昌李成謀蔣凝學兩軍謀於湖北訓義兩軍謀於皖北而金唐朱各軍謀於皖南然當皖南十六營鼓動時獨義從左一營帖然無恙聞該營官楊啟益平日發餉足服眾心故臨亂不惑是

各營之變其罪本不盡在兵勇然兵勇以譟亂爲慣技狃於故常毫無懼其患何所底止自須大加懲創再議遣撤擬俟唐鎮抵營後一面剴切曉諭一面勒令金道唐鎮每營交出倡亂者一二人解至大營嚴訊究辦乃可分別撤留來稟請飭唐鎮將滋事之人交出與此閒意見相合惟勒令交人又必紛紛煽誘甚至激成大變如金口一起亦屬意中之事而外閒亦將以息事安民辦理不善等語相勸相嚇仰該司等堅持定議鑒於本部堂不得已之苦衷相與剛斷從事不復參以一前一卻之說以淆眾聽每營除拏辦一二人外餘仍全發欠餉告示中亦當詳明言之也唐鎮未到之先仍當祕密爲要撤勇卽補兵額

批牘卷三

三

之說近日多建此議不知湘軍營制口糧每月四兩二錢一倍於馬兵三倍於守兵守糧月支一兩斷不足以供衣食且參將都守率皆曾充哨官什長以補兵缺斷不情願本部堂於上年七月二十九曾將此義覆奏一次至副鎮以上品秩較優缺額益少以提補鎮以鎮補副近來朝廷亦多通融補授并未拘定成格然保者數萬而鎮副參游之缺不過數百何能贖人之欲江西段糧道請將凡保之武官概准在籍支食全俸亦難籌此巨款此等大患只好待變生而救之竟不能預立一法以防變矣本部堂北征之初原擬駐紮徐州行至清江而捻蹤全竄皖北則又改赴臨淮調回劉銘傳一軍由睢溪口進剿周盛波

一軍由蒙城進援周軍已於初三日解雒河之圍劉軍亦將石弓山老巢攻破該逆尚未知圖竄何路日來淮水盛漲已飭黃軍門統帶礮船駛赴正陽潁州三河尖三處與來稟所請令水師分布長淮者亦正相同本部堂初次奏陳大局謂專用力於四省十三府州厥後又奏擬於濟甯徐州各紮勁旅一支以運河爲運道臨淮周家口各紮勁旅一支以淮潁爲運道另籌馬隊一支作爲游擊之師惟臨淮至周家口相去太遠現飭英藩司移駐潁郡劉軍門駐紮周家口該司等所慮之太和阜陽歸陳永城諸處均在二百里內外必可兼顧以上各端已行者必益求精密未行者當次第舉辦以無負該司勤相啟告之意惟軍情瞬息千變不知將來能如願以償否耳

批牘卷三

三

徐州營務處張道樹聲稟陳管見臚列各條請示由

徐州轉運與臨淮等處微有不同該道未雨綢繆慮事周密良以爲慰本部堂前於清江轉運局吳道稟內批示轉運徐州各件能至周家山頭起岸船到卽知會徐州張道放車往運若水涸止能在皂河起岸須先期派員至皂河預備車輛小車則雇用山東蘭郟之車大車則用徐屬牛車均以民價雇定徐台并無長雇之車仍須由該局會商張道一手經理總以趁八月水旺時運畢爲妙等語想吳道已轉移該道矣該道稱車少則雖運至百餘日之久若能兼辦騾車更好無論牛車騾車蘭郟小

車概由本部堂撥款發價由該台按月核實開報不准攤派州縣分毫致民間受派差之苦轉令大小車輛走避一空登陸應在灘上卽如所擬辦理秤斛布袋由清江轉運局吳道妥籌辦理此次分配子藥李署部堂已另搭配洋藥八萬磅及洋火等件想行知該道矣該局委員准添派員月給薪水銀兩由該道酌擬開單請示局名或多二字仰自行斟酌爲之本部堂定於七月中旬抵徐未盡事宜屆時面商可也

統帶精毅營席臬司寶田稟軍營紛紛譁謔誠爲世變大憂未事之防管見所及凡數端縷陳察核由

韓營譟變卒能遣撤無恙事後又懲辦營哨勇多名尙屬處治

批牘卷三

三

得法所論各端消患未形俱中冑繁而結盟一事尤爲莫大之患近年以來各營相習成風互爲羽翼抗官譁餉皆由於此實乏禁遏之良法第二條言營官於勇之飢寒困苦漠不關心激亂之端往往以此藉口杜陵所謂安得廉恥將也第三條多汰老勇本部堂近亦力主此說惜見事稍遲微休兩軍業已大鬧不堪昨有查辦一札告示一件附寄該司一閱不知可不激成大變否第四條兩軍同紮近處卻難預必主兵者亦不能持此見以爲調度至湖南遣撤多營聚數十萬無業之勇是否安靜無虞是則關乎天心 國運難以逆睹耳

統帶吉中和厚等營李提督祥和稟新招勇丁潛逃懇札

飭靈璧縣令飭差緝拏解轅究辦由

淮北之勇初次應募或不耐營規之拘苦遂爾私逃此次暫不緝拏俟三月以後再行按律懲辦諺曰教子嬰孩教婦初來該提督務當督飭營官哨官什長苦口訓導一次不聽則再教之三教之若語言不甚通曉多說幾徧務期明了而後已本部堂之意冀以湘軍之規模開淮北之風氣該兩營爲之倡導先在孚其心志次在教以規矩總以耐煩二字爲要久久自有效驗

統領銘字營劉軍門銘傳稟三件

十二十九三次來牘均悉一件言到防日期一件言請假治病一件言添立馬隊分條批答於後一柴草爲軍中要需刻不容

批牘卷三

三

緩若非就地採辦斷難應急若令兵勇下鄉樵採又恐滋生事端有礙聲名本部堂前於潘道鼎軍柴草一項係咨請閩撫部院札飭該處州縣採買供支該軍五千五百人加以長夫每日約須柴二萬二千斤草二千斤貴軍在豫自應一例辦理仰候咨請吳撫部院札行地方仿照辦理如豫省斷不冒供應請貴軍門自行價買其錢自本部堂發給一本部堂原奏之十三府州縣開許及南汝光均不在南五月初九十三日兩摺已咨行貴軍門矣近七月初八日二十四日兩摺仍係堅持初議惟有時亦難悉拘成見昨有一咨請貴軍門於周家口前後左右三百里內進止悉聽自爲裁酌本部堂不爲遙制誠以軍事變動

無常必須因機制變故稍參活筆也若洛陽以西則轉運萬難
又恐空勞往返故貴軍門不宜西去不能不懇切上陳兩摺鈔
發閱看一貴軍赴援上蔡該逆聞風遁逃未及痛勦貴軍門引
以爲恨具見懷抱之偉現因暑溼鬱蒸舊疾舉發皆由馳驅太
久積勞所致斷不能不休息數月藉資調養惟刻下豫事甚棘
貴軍門聲望正隆與近年楊鮑相埒必須奏准乃能回籍應卽
在軍中調理無庸請假回籍貴軍門志在滅賊擒逆一日不平
卽一日難釋此重任古人有臥護諸將者可做而行之也另單
開列之道員劉盛藻記名提督唐殿魁記名總兵黃桂蘭畢乃
爾張景春先行存記俟有缺出本部堂附片具奏請 旨簡

批牘卷三

三

放一貴營添立馬隊本部堂業經允許茲已立張景春劉盛瑞
二營以後只可添哨不宜添營馬隊以養馬爲第一義甯可馬
浮於人一倍不可人浮於馬一匹其營制營規俟到徐後定一
妥善章程刊刻其守貴部至二十日以前小口糧之資續到馬
匹喂養之費均照所擬辦理另單所稱烏參領馬隊鍋碗帳棚
等項一無所有仰候札飭清江轉運委員郭道趕速解送以濟
急需長夫一層亦俟章程刊定後一律辦理凡委官太多兵勇
太疲者概加裁汰遣撤回旗以期漸就範圍徐州新到察哈爾
馬隊言語不通無人管帶春協領旣於該軍漸啟猜疑候本部
堂抵徐後查看情形酌量調用

前皖南道張鳳翥稟二件

皖南各軍鬧餉情形本部堂業已洞悉該道既赴徽休則已既
往赴難則當懷必死之心抱不屈之氣韓昌黎之說王庭湊幸
而得生顏魯公之說李希烈不幸而死二公者禍福不同而其
初去之時懷必死之心抱不屈之氣則一也該道若抗辭不屈
其禍未必更甚於毆辱若自度平日無恩無情臨急畏毆畏死
則當時不宜輕於一往卽曰韓顏之正氣偉烈非尋常人所易
幾及然危急之際逼脅而書期票既出之後亦應自陳辦理之
謬稟商懲創之法乃屢次來稟專務借錢籌餉一若各營之鬧
分所當然但求善撤而不可得者又久駐婺源迹涉畏避措置
不善之咎其焉可辭此次本部堂查辦具有苦心蓋恐嚴札一
到立卽反叛則該道首受不測之禍故將該道之札先發一日
撤委調省以避凶鋒將來結案之時亦必將該道委曲苦衷詳
晰奏明妥爲位置但仍視兩軍之果叛與否以爲輕重耳
汪令志趣篤實爲僚友中不可多得之人此次在途中痰而逝
良用惋惜身後之累彌復可憐卽在身釐局撥銀一百兩周
恤其家其所著崇祀錄一書并未攜至行營仰候檢出時由驛
遞交該道以便轉寄該門人等收存

統領強中等營唐鎮義訓稟查辦倡首鬧餉一案

兩稟均悉該鎮接到查辦札後卽將爲首鬧餉之楊富生馮其

隆二人正法梟示所辦極爲明決可嘉之至強中前營營官王品高暗中指使情最可惡何以准其乞假唐義謨昏憤一至如此候卽密咨湖南撫部院飭令湘鄉縣本籍速拏王品高解營究辦王品高向居何都何地與何人最熟仰該鎮訂封密呈湖南撫部院以憑核辦其餘各營官如強左強中兩營勒逼張道情節尤重斷不準巧爲開脫本部堂查辦札內已指明提究如該鎮查出各營中尙有罪浮於強左強中兩營官者仰卽一併押解來營聽候分別審辦至同鬧之勇丁斷不能僅斬二人希圖了事該鎮旣稱鬧餉之時羅元彪並未在場則當時在場同鬧之人自應黑白分明歷歷可指仰仍遵照前札每營查出二

批牘卷三

美

三人解營審訊如慮解徐州太遠卽解至安慶本部堂派員至安慶迎提本部堂於該軍鬧餉之案澈底查辦寬嚴相濟一面拏究凶犯所以嚴懲此次倡亂之弁勇也一面全清欠餉所以寬待從前立功之弁勇也若凶犯並未解到而欲全清積欠斷無如此辦法該鎮接到此批迅將貪庸之營官刁健之勇丁查明解營不准以被脅從鬧求免追究爲辭除王品高及楊馮二勇外至少尙須起解十二人本部堂平心研訊分別輕重斷不全行誅戮今日有人犯解到安慶明日卽札飭山內糧臺清理該軍積欠悉數遣撤其札預存於何藩司處以免耽閣如人犯一日不到一日不准發餉不持不清積欠并不准支新餉分文

該軍餉項截至閏五月初二日傷張道之日為止此案雖半年
不了初二以後概不給餉矣本部堂遣撤各營均發全餉惟吳
守廷華之新仁依仁營僅發兩箇月何鎮紹彩之訓字營歐陽
勝美之義字營僅發四成以其因鬧事而撤也該軍截至鬧事
之日為止全清前此積欠已較各軍爲優矣

統領義從等營金道國琛稟查明營中江湖結會情形

據稟不勝詫異該道七月初一日稟覆一件此間於十三日接
到據稱撤換營官并清查侵挪剋扣再行查辦等語本部堂接
閱時因已發七月初二嚴辦之札是以未經批發意謂該道接
到嚴札必應澈底查明遵札解送人犯來營乃接閱此稟於本

批牘卷三

毛

部堂札內層層飭查之事一概不復忽以查辦哥老會爲名敷
衍滿紙僅稱擒斬龍家壽孫起貴汪正順彭星益四人而於各
營官及解犯等事一字不提無論張道所稟該軍貪劣之營官
歷歷可數卽該道七月初一日稟內所稱劉秉珩王福順王玉
藻王俊南趙仁和等種種辦理荒謬豈全不應解耶昨唐鎮稟
覆此案僅斬勇目二人而爲營官作求免之詞已屬不明事理
然過於寬縱則有之尙不失之油滑該道所稟則以油滑文其
寬縱該道帶兵十餘年於奏明提犯審訊之事視同兒戲何糊
塗一至於此本部堂昨已嚴批唐鎮除已斬二人外至少再解
送十二人來營審辦合計唐鎮七營每營查辦二人該軍十營

關餉與唐軍同而唐軍則多毆辱張道之罪該軍查辦人數姑從寬減亦照唐軍之數至少解送十二人來營本部堂平心研訊分別輕重亦斷不概行誅戮該道接到此批迅卽查明押解不得以被脅從關求免追究爲詞其中如瑞左營係首先關餉代理營官王福順本部堂查辦札內已指明提究又如該道前稟所稱劉秉珩分餉不公王玉藻王俊南軍心不洽趙仁和信用其弟守備趙友交匿銀不發以上營官五人守備趙友交一人均在必應提解之列斷不准巧爲開脫此外刁健最著之勇丁再由該道密拏六人解送以符十二人之數如能多拏一二入尤見認真查辦現在行營駐紮徐州離徽太遠該道卽派人

批牘卷三

吳

解至安慶省城本部堂已派員至安慶迎提矣其有并無過犯而明白曉事者仍遵前札酌派一人前來以備質證本部堂查辦此案寬嚴互用一面拏解凶犯一面清理欠餉如凶犯並未解到而欲全清積欠斷無如此辦法該道果能遵札押解凶犯今日有人犯解到安慶明日卽札飭山內糧臺清理該軍欠餉悉數遣撤其札預存於安徽何藩司處以免耽閣如人犯一日不到一日不准發餉不特不清積欠并不准支新餉絲毫該軍餉項亦照唐軍截至閏五月初二日爲止此案雖半年不了閏五月初二日以後概不給餉矣本部堂遣撤各營均發全餉惟吳守廷華之新仁依仁營僅發兩箇月何鎮紹彩之訓字營歐

陽勝美之義字四營僅發四成以其因關事而撤也該軍截至閏五月初二日爲止全清前此積欠已較各軍爲優解犯則斷不可寬雖激成巨變不顧也

蔣道凝學稟遣撤湘皖馬步八營緣由

該部各營業業經遣散淨盡均能安帖足見平日待人發餉胥屬公平尙未十分決裂嘉慰曷已惟該營以二十餘萬之欠餉而鄂臺欲以七萬兩了之致令該道與各營哨官坐受逼索此情亦極難堪既稱官爵督部堂諭與藩司商酌似猶未爲絕望仍應稟請官爵督部堂酌核辦理本部堂遣散各勇俱發滿餉惟統領營官有令其繳出截曠銀兩者爲數亦殊無多自問并無虧苦軍營之處乃徽州唐金兩軍於五月底大鬧十三日之久毆傷道員深爲可惡本部堂於七月初二日發去查辦札一件告示一件唐鎮於八月初八日稟復旋又批飭一件茲將三稿鈔給該道閱看本部堂辦理此事果有當於天理人情之公否如果當於情理而該營始終不交出凶犯雖釀成巨禍如霆營金口之變亦不顧也

唐令翰題稟奉委辦理江甯全屬輿圖完竣緣由

輿圖各幅均屬妥善府縣交界處尙能接合說亦明晰具見積學苦心山川方位以內府圖李圖爲藍本而參用省志府志填繪惟江甯淮安徐揚及省志均無善本舛錯頗多必重加考訂

方可依據淮揚裏下河水道似以馮道立水利全圖爲藍本其人半生力學皆在河工故運河各閘下河羣流交匯處不差毫髮該令所繪河道源流實所自出尙不如馮圖之尺寸皆合也明末濇口已成平陸靳文襄始開引河四道張文端又加開太平引河卽三岔河也厥後名雖更易而引河之有五如故咸豐間又淤成平陸目今似僅有一河此圖府縣皆畫兩引河不古不今不知何據江甯城西北太尖長是稍疏處然大段精緻完整甚屬難得長江圖皖圖一并收到前刻金陵圖發去備查

委查亳州圩務李丞炳濤稟到差日期及奉批訪查各緣

由

批牘卷三

早

亳州之患始因鄉愚被惑而從捻後因圩長持兩端而畏捻推原其故皆由官軍不能捍衛地方官不能認真辦理所致所論頗中肯綮該員當力挽其弊以廉律己以勤治事以公處人此三者闕一不可而欲求紳民之欽服尤在取與之際一絲不苟本部堂於查圩事宜薪資從厚獎勵從優者正所以勸人之廉也

安徽懷遠縣崔令秀春
委查懷遠圩務林守士班

稟會勘西鄉各圩并請圩長執

照由

該縣西北接壤宿蒙自宜於緊要處下手慎擇圩長嚴查莠民皆正本清源之道尤貴以廉勤二字自勵廉則己身與隨從之

人一塵不染自無蒙蔽偏袒之虞勤則身到眼到暗訪明察自無黑白倒置之事於本部堂所定四條外該員等能就懷遠情形另議詳細章程否

委查蒙城圩務朱令名操稟查明蒙城各圩情形繪圖呈

候訓示由

該員在蒙業已月餘所論自多實情各圩現有之圩長原不能盡人而更換之亦不盡人而皆不肖是在該員等細心訪查擇其可用者用之不可用者去之執照徐徐給發亦無不可然亦必有速發者一概緩發則不可既發之後如查有劣迹者仍可隨時更易至稽查之法在外從圩者限一月回家爲期稍迫應

批牘卷三

望

予限兩箇月私出從捻者亦應限圩長以半箇月舉報過期不報者卽以袒護論仰商之林令出示辦理至所稱救病之源莫如使之親信然非勤而且廉至誠惻怛則不能使之親非勸善懲惡一秉至公則不能使之信此其責專在委員矣本部堂於稽查圩寨一事派有專員以印官自有地方公事不能日日在鄉稽查昨已頒發令箭生殺予奪委員俱得自由本部堂但患該員等之姑息不患該員等之專擅也如有掣肘之事專擅之謗本部堂必能維持申理該委員等亦須盡心竭力而以巽慎出之處處與印官和衷商酌無論一年半載總以辦到無餘孽爲止無庸預爲推諉也

會辦蒙城圩務張牧虎文稟奉札日期并陳管見請示由
修坑塹添設梅花樁均屬堅壁條中應行之事仰該員等實心
經理第一條教誨自新之民尤爲切實下手工夫本部堂帶兵
多年亦不外隨時隨地苦口苦心教誨諸將圩中愚民不能徧
教擇紳耆而教之只要語語從肺腑中流出聽之亦必有點頭
者幸勉力切圖之

委辦亳州民圩事務薛令元啟稟請領薪夫等項由

分別良莠爲正本清源之道關係甚重該員操守頗好辦事實
心惟才識稍短條理不甚詳晰宜更廉正以葆其所長精勤以
益其所短遴選紳董必須一塵不染鄉黨所共推者方足以資

批牘卷二

望

分理墨領一紙批發均由徐州糧臺支領

委辦蒙城圩務桂令中行
蒙城縣林令用光

稟紳士幫辦圩務并渦陽地界

請發執照由

守備陸懷武都司魏大用准其幫同辦理西南北三鄉圩務惟
分別良莠須廉明而兼細心之人方能無枉無縱若一味任性
輕率必不濟事魏都司已作兩處汛官尙不甚沾染官場氣習
否告示稿甚好淺顯通暢處幾有王陽明呂新吾之風特肫懇
真切處不及耳直須設身處地譬如自家住在蒙城親族鄰右
一家爲捻百家受累不能不苦勸親鄰以保身家則立言自更
真切矣當面教誨紳耆時亦宜常存此意至囑至囑

水師四營營務處袁丞秉楨稟陳酌擬整飭水師規條呈
候批示由

據稟并另摺均悉所論各端詳細切實具有條理至慰至慰水
師營制彭部堂所轄內江十營多守本部堂原定章程楊督部
堂所轄外江各營章程時有更改以致參差不齊該員所管營
務就外江四營中條陳各件批答於左

第一條營官薪水准照所擬每月通給銀二百兩以五十兩爲
薪水以一百五十兩辦公所有桅旗艖旗號衣每年閤營更換
一次均取之於辦公銀兩內不得更派哨勇裁去加增名目其
哨官薪水亦如所議外把千守每月通給銀十六兩自都司以
上按級加增至十六兩而止外委千把當年亦有按年月加增
之例後因官階皆已漸進漸大遂將年月一層共忘之矣

第二條每營舡隻本無定制楊督部堂所擬則以舡板二十號
長龍一號爲定例巡湖營祇有十六號准照數添足

第三條舊例長龍勇夫三十名舡板勇夫十六名閤營通計三
百五十人營哨官之坐船均應仍於長龍舡板中撥人撐駕正
後營之侍勇十名可以裁省巡湖營俟撥足二十號後亦將侍
勇十二名裁去

第四條舊例帳棚棚索一年一換長龍給錢三十六千舡板給
錢十八千此例不知何時所定本部堂初定長龍係發布八十

丈舳板發布五十丈舳板發錢十八千尙不爲多長龍則尤充足毋庸議添

第五條舊例風篷篷竹繩索三年一換長龍給錢二十四千舳板給錢十二千該員所擬舳板改爲十五千每年每舳給補錢二千新製之年不得支領長龍照尙屬準情理之平惟初定時風篷係由舳廠發給此條候咨商彭部堂黃軍門再行定議第六條繩索篙槳礮等事亦候咨商彭部堂黃軍門再行定議第七條舊例船隻五年一換三年一修爲期甚遠赴局修換儘可於屆期之前三兩月具文呈報飭舳局修舩不致別有稽延第八條每營油燭准照所擬月給錢十六千文由營官採買散發

發

批牘卷三

器

第九條更香一項與火藥皮紙仍應由糧臺採買散發不宜盡折錢文致失舊制

第十條花名清冊四季造報應註年歲籍貫及入營月日均照所擬辦理至分前後左右四大哨該四領哨及號衣寫某哨第幾號均可不必營官若勤於稽查縱無領哨二十號舳何難徧查若營官懶惰哨領又豈可恃乎

第十一條營務委員本有坐船一號出外巡查則舳板不必更用長龍烈風甚雨無庸出查可也

批安徽石埭縣典史代理安慶府經歷袁起稟

隨園圖存覽俟軍務稍暇再爲題詠以表詩人遺蹟詞二闕詩四章稱譽過情祇增愧恧

臨淮營務處張編修錫爍呈酌定軍船條規緣由

任法不如任人六部之法可謂多矣而書吏之弊更多臨淮攜船一事本部堂所恃者惟在貴編修與劉鎮二人之心耳心不公明則雖有良法百條行之全失其本意心誠公明則法所未備者臨時可另增新法以期便民所議船票一條儘可不必第三條如遇有船可換之站准託地方官代雇更換尤滋弊端書差之畱難需索更有甚於營弁也所稱得乙放甲得丙放乙果有實事可指否此等應與劉鎮商明會銜呈請乃爲妥叶

批牘卷三

署

委辦亳州民圩事務李丞炳濤薛令元啟亳州知州李孟荃稟祇領令箭并開用關防日期由

亳州向爲捻逆巢穴稽查民圩較他縣更須認真亦較他縣爲難辦該員等但當徐以圖功不可操切從事凡地方之頑梗者開導之紳董之不受者更換之自守以廉而濟之以勤無論一年半載總以辦到無餘孽爲止本部堂於此次查圩之事所以使印委各員合辦者以印官呼應較靈也所以責重委員者以印官不能日日在鄉也委員有薪水辦公銀兩親兵書識所以示絲毫不擾於民也今該牧欲以查田之事與查圩之事同時並舉畝捐錢文以爲辦公經費合兩事爲一事大非本部堂立

法之微意各圩紳董清查戶口辨別良莠其事甚繁亦無暇再查田畝且愚民易惑難曉將謂查圩之事專爲畝捐起見何以使之從忠革薄與印委各員相親相習乎稽查民圩除紙張外亦無多須經費如果委員經費不足儘可直稟本部堂酌量加增不惜重貲期於不取民間分文斷不宜以查田之事混而爲一致滋弊端也

臨淮營務處

劉鎮松山
張繼修錫麟

呈營混游勇肆意擄船請飭查

禁由

營勇拏船節經本部堂出示禁止此風尙未哀息是知紙上之法固不足恃也臨淮一帶本屬通衢營混游勇不能保其必無

批牘卷三

吳

貴鎮等既稱月餘以來河道肅清上至正陽關無敢擄船順流而下營混至相戒不能飛渡臨淮等語是於清理杜禁之法業已辦有成效大驗祇須循而行之此輩久久自能絕迹無庸更議新法至多添書差於營勇拏船之事毫無裨益不如不添爲是古人所謂多一窗榻少一天光也臨淮之營調赴徐州者頗有在泗州時村等處雇船之事亦自無可如何候飭令查禁妥爲和雇臨淮營勇有自行拏舡毆傷鄉民顧景春一案果係何營之事仰仍查明稟復

前浙江鹽運司李榕等會詳遵札審訊採買戰馬委員副

將蕭以德都司馬長清互控一案議擬緣由

副將蕭以德奉委帶同馬長清出口買馬蕭爲沿途彈壓照料之員馬爲口外熟識採辦之員不思和衷共事輒以爭擅利權互相訐告本部堂前以買馬爲重批令馬長清獨辦其事該都司買馬回南沿途自派前站處處藐視蕭副將雖據供收受雄縣折辦麩草銀兩未曾逾額而倚勢作威情狀業已全露所控蕭以德向索銀六百兩訊無實據蕭以德通共僅支銀六百七十餘兩而部費會票費用資等項均在其內斷無侵蝕六白金之事馬長清首先誣控厥咎較重蕭以德所領霆營糧臺銀肆千零五十兩查無短少其寄家之銀指爲代自他人或尙可信惟於到口之日挾制馬長清幾誤公事亦屬可惡馬長清應參

批牘卷三

七

劾二級以守備降補蕭以德應參劾一級以參將降補用示懲警惟念此次所買之馬尙屬臙壯較常略佳營務處業經驗收之六百九十四匹准照例給價銀十三兩五錢由臺先發足六千九百兩其餘每匹應補三兩五錢俟緩數日再行全發仍勒令蕭以德馬長清再行出口買馬一次以試該二員之孰優孰劣二員各執一票各發銀三千兩先後進京赴北口採買將來買就時回營孰遲孰速馬匹孰肥孰瘦在途孰爲安靜孰爲騷擾以定二員之優劣如其馬肥回速在途安靜卽將此次應參之案加恩寬免如其馬瘦回遲在途騷擾蕭以德除參降一級外再行加參革職馬長清除參降二級外再將此次應找之馬價

罰扣一千兩仰該司道等剴切傳知蕭副將馬都司遵照

委辦蒙城圩務桂令中行稟查閱東鄉鄒家圩情形

鄒家圩從逆已久鄒老金竟敢挈家自捻來歸妻妾之所自來皆不可問又與雉河之鄒目往還不絕其爲甘心從逆已無疑義鄒學禮曾爲苗沛霖局董亦非善類當此立法之始若不將居心叵測之人立于誅鋤以後必節節阻撓仰該員等將鄒老金與雉河之鄒目一并嚴密查拏正法鄒學禮如實係莠民亦卽正法曉諭各圩以示懲戒至歸併之法稟中不甚明晰將此圩鄒姓及眾姓三百餘戶全徙於附近之他圩乎抑不僅徙入一圩而分徙數圩借他姓以鈐制鄒姓乎告示四條中本無令

批牘卷三

吳

不可靠之圩遷併他圩之條後因林士班有併圩之稟札飭該員等亦但令小圩歸併大圩初未嘗令莠圩併歸良圩也告示有云入莠冊者在籍則擒拏正法該員等但當遵示立誅莠民如全圩皆係莠民請兵勦洗可也不當勒令併圩於告示之外另立新法使民無所適從一圩至三百餘戶之多其不願遷乃屬常情稟中所稱懇之再四者僅鄒姓不願遷乎抑眾姓皆不願遷乎除鄒老金鄒學禮外鄒姓之甘心從逆者究有若干能一一訪查其名乎仰迅速縷稟以憑核奪

委辦阜陽圩務尹牧沛清程令兆和稟查明圩寨分別去畱緣由

阜陽縣

該牧等稽查圩寨於西鄉各圩中畫出段落互相團練尙屬有

條不紊惟西鄉十四團五百八十七圩據所稟之數核之畱者二百八十圩去者乃三百零七圩一鄉之中圩寨平毀大半推之四鄉去者幾千餘寨與本部堂四條告示殊不相符本部堂告示中第一條堅壁清野第二條分別良莠初無平毀之說厥後因林士班之稟始批令將零星不能自存之圩酌量歸併然亦須因地制宜不强人以所難非謂將良莠不齊之圩一律去之也大凡一圩之中或房屋堅實而不易遷或田地就近而不肯遷皆人之常情該牧等須試爲設身處地期於一令之出眾卽遵行禮所謂知事人然後能使人也且良莠之不齊處處皆然不獨此三百零七圩其准畱之圩果皆良乎一圩之中著名

批牘卷三

兗

匪人不過數人嚴拏正法可也若全圩從捻派兵洗之亦可也斷無以平毀爲查辦之理仰尹牧卽將經手事件交與程令作速來徐本部堂面詢一切再行核示

統領銘字營劉軍門銘傳稟俟車駝到營卽馳赴光固相

機進勦由

該逆欲在光固一帶築營度歲聞燒殺擄掠之慘尤甚於前該處民心望援孔切不啻蹈水火者之求救實屬耳不忍聞貴軍門游擊南汝光一帶久經奏明遐邇咸知惟銘軍平日之聲威尤盛故此時望之尤殷亦責之尤切雖使車輛無一到者亦當就現有之夫卽日起程縱令日行僅二三十里亦勝於全不拔

動也至囑至囑

馬丞文夢稟查復徐防兵勇駐紮豐縣擾累情形

拆屋砍樹舊迹猶存且聞該處士民於銘字營則歌頌不置於鼎字營亦感其戰功之偉而怨其微有騷擾獨於樹徐兩軍極口怨謗民心至公必非無因而致此究竟係樹營擾民較甚乎抑徐防營尤甚乎仰全軍營務處徐防營務處會同細查稟請懲究

委辦蒙城圩務桂令中行稟查閱渦河以北各圩情形并開摺繪圖呈覽由

蒙城習於從捻陷溺已深有非法令所能止全賴該員等不憚

批牘卷三

五

煩勞苦心訪察苦口開導明之極而才略生焉誠之極而感化見焉卽多殺匪黨亦須自明字誠字中做出至於圩長之賢愚圩寨之平否儘可從容查辦而以有恆持之不患其無成效也

臨淮營務處張編修錫燦呈逃勇一條請酌核定章辦理由

逃勇一條全在招募時不收無根之游民而哨官什長平時又體卹而防範之則此弊自少若已逃而復獲輕則責革重則正法須臨時研訊情節察奪辦理難以一律相繩長夫亦然民夫惟拐逃衣物及在外行兇必應嚴懲餘則可輕辦也

臨淮營務處張編修錫燦呈可否因勢利導多募數營以

資防勦由

該邑應募者多准再添募一營以前已成之營爲中營而以此次新募者爲左右兩營本部堂亦急思將湘勇規制推而行之淮北而不能驟然多增者一則恐餉項不繼二則見該處現無營官之才也李爵署部堂於咸豐十一年冬初招淮勇亦僅四營其營官卽劉軍門銘傳張臬司樹聲潘臬司鼎新吳副將長慶四人也凡得一將才三分人力七分天命該營務處意謂激勵裁抑誘掖獎勸便可鍊出人才則視事太易耳

同治五年丙寅歲正月起北征行轅

委辦亳州查圩事務

薛令元啟
李丞炳濤

稟查辦各保情形

批牘卷三

五

該員等所論稽查情形似尙認真辦理惟各圩怙惡不悛之徒既有所聞應卽隨地隨時擒拏正法該員等又謂恐此有所發則彼有所逃欲俟清釐既畢之後同時查拏不知亳州地面甚寬該員等帶人甚少斷無同時能拏許多之理各匪徒轉得從容颺去殊屬因循姑息大負委任必須隨時擒拏使各怙惡者知在外爲賊卽不得在家爲民尤不得去來自由混其身於時揜時民之閒總以當幾立決購線捕誅爲主至各圩應去應畱該員等於經過時當已察酌情形胸有成竹亦貴當幾立決無待於各鄉紳董之會議致滋紛呶也

委辦蒙城圩務桂令中行稟查圩情形并密陳管見二條

以備採擇由

該員數月以來辦理俱有斟酌良以爲慰循此做去自不患無效驗移風易俗本非一蹴所能幾也圩規四條經此刪節委曲詳盡足以感人卽可照此刊刻繕發總可勸化一干可善可惡之人至查出之莠民十六人多係在營此等習氣根深蒂固本難驟變如有挾制圩務之處無論何人何營臨時具稟請示本部堂必思所以懲之此外藉公肥己之徒或革或責該員儘可自主古人所謂鐵肩辣手此等正用得著另摺所呈二條極有卓識牽一髮而全神俱動殊不易辦然本部堂當從容籌畫期於澈底澄清而後已

批牘卷三

五

委查阜陽圩務

翁游擊開甲尹牧沛清

稟會同親赴西南鄉查緝情

形

李姓等數人是何名字圩長藉以購線則可倚以集事則不可該員等何不帶親兵躬往查拏若僅以文書稟上行下奉行故事則大失本部堂委任之意矣翁游擊係幫查之員何以銜名反列於前并飭

統帶義勝全軍章副將志俊賀年稟

該將本係告假回籍之員經官爵閣部堂驟加委任自應感激抒誠力圖報稱惟湖北兵勇向不可靠該軍係倉卒招募而成無暇揀擇其中必多游手無賴之徒該將須先講營規申明紀

律然後再求勦賊之術勤廉二字是自治之根本不擾民三字是治軍之根本該將將此五字自治治人兢兢業業慎之又慎或可保全合名也

委查阜陽圩務

翁游擊尹牧沛

開甲

稟籌辦查圩各情

該員等之職卽專以查匪爲重地固匪行劫擾害亦匪也此稟恍如大夢初覺前此固不知查匪爲分內事耶該員所請之幫辦較之蒙毫等屬已多尙復稟請紛不已專從周旋情面上著筆置公事於不問以後如有拏獲之犯正法之案再行具稟此等空稟不必屢瀆本部堂在軍多年實厭看虛浮文字也候選訓導計棠等稟奉札赴河南一帶勸諭圩寨可否酌

批牘卷三

帶書識長夫親兵由

該員等赴豫專以拊循開導爲事常與紳民接見不必與州縣往還亦不宜稍涉張皇蓋河南牧令與紳民素多隔閡該員等以安民爲名必須深自斂抑陰行其善若過於矜張形人之短乃所以致齟齬也無庸通飭各州縣及軍營知照該員等准其帶書識一名親兵四名以爲張貼告示之用

受業陳枝蓮賀年稟一件并陳辦理保甲興舉義學由

該令辦理保甲興舉義學與諸生講論文藝於勤字已能切實用功嘉平之月詞訟減少亦收勤字之效至於廉之一字其效先見於宅門內之四項人次見於頭門內之二等人卻無明效

大驗見於百姓之身挂於百姓之口如必欲百姓頌官之廉則不免於矜炫矯飾反非出於自然可以持久之道故勤可以得名廉則不宜有名此中最貴體貼四川循吏現有幾人宜擇一二深交而觀摩之近人張文端之教子弟汪龍莊之論良吏皆以取友爲要不可不師其意也

臨淮營務處張編修錫嶸呈報募齊新添二營勇丁啟程
赴臨日期由

近據各路稟報捻逆又有北趨之勢臨淮甚覺空虛敬字左右兩營募齊希卽認真訓練冀成勁旅勸誠淺語中言訓有兩端將領之教兵勇爲營規父兄之教子弟爲家規練有兩端練技藝可使十人敵數十人練陣法可使千萬人如一人雖未說得甚暢而此四者實缺一不可望實體而力行之

濟甯嘉祥金鄉等縣士民曾傳照等稟商廉貞誣陷曾毓
鰲懇賜咨行暫釋回籍堵禦賊匪等情

當咸豐年間各省土匪蠡起之時州縣辦理團練拏獲匪黨多係奉有格殺勿論之諭或有准以軍法從事之札若事後紛紛翻案則是非膠葛治絲愈棼有礙於政體本部堂前在湖南辦團及在湖北兩江等處凡州縣及團練所殺土匪來轅翻控者概不准予申理以翻之不勝其翻也商潔貞旣係長鎗會匪之首經金鄉縣錢令拏獲正法何以商廉貞京控曾毓鰲翼翻此

案仰候咨詢閩撫部院將全卷大略摘敘見覆會疏鑿可否准釋再行示諭該紳民等可也

委查亳州圩務李丞炳濤稟查獲迭叛擒首劉二能等五名訊明正法由

該丞於訪聞劉二能等消息之後卽能糾用民團查拏正法此爲官民一氣之漸辦理尙屬妥善爲之一慰所有此次酌發之飯食銀三十八兩賞卹銀八兩均准赴臺支領王大山以踴案被殺應照陣亡之例給銀三十兩仰再赴臺補領二十二兩給其家屬從前湖北興國州爲盜賊之藪胡文忠公派邢守高魁捕誅千四百餘人以後便不窩藏粵匪近年山東蘭山費縣土匪如林閩撫部院札長守康王守成謙各殺千人而閩邑肅清擒匪不敢入境該三員皆有明效皆得優保仰該員商之薛桂張朱各員認真查辦不可稍涉姑息也

候選訓導

計毛印堂

候選直隸州州判寶鉦稟分赴宛汝查

辦圩寨由

據稟已悉本部堂在徐州啟行時本意一月有餘卽可由歸陳

委查亳州

鉦樸范之間近日以全力與該逆爭扼運河

驟再行示諭該紳

善之區劉周諸軍已到日內必有大戰不

案仰刻咨請閩撫

期遙遙莫定該員等自應將曉諭圩寨事

宜先期舉辦該員等此次恩恩入汴所過之處不過貼告示一
張與圩長多不得見面者形同逆旅自難使民間其信必須在
所經之州縣每處多盤旋幾日苦心誠求苦口開導總須辦到
圩寨釋去疑慮兵民一氣而後止若謂開歸陳數百里之廣數
千圩之多其中無一頁與湘淮軍通氣之圩圩長無一可與言
之人此理究不可信若遽分三道入洛入汝是猶掘井尚
未及泉而欲改掘數處以求速效不知頭緒愈多用力愈勞愈
無及泉之期該員等仍當專力於開歸陳三府擇一易辦之縣
從切實處下手一縣辦有成效然後再移他縣他郡至於賢才
之有無不可預必如有灼見開單存記候本部堂到豫後察看
委用求賢以治本諭圩以治標二者兼營其餘力不能做到分
不應與聞之事不管可也

銘字營劉軍門銘傳稟軍抵周口休息兩日緣由

張總愚股匪向聞不如任賴一股之強然我軍日來與戰三次
初四獲勝初六初七卽有兩次挫敗張逆凶悍如此况任賴等
逆人數較眾其悍過之雖經潁州苑寨兩次邀擊獲勝而并未
傷其精銳豈肯輕自散去其沿途逃散者不過新擄之眾耳該
逆所到之處擄人擄糧彼散此聚於人數仍屬無損自咸豐以
來辦此賊者不曰勢極窮蹙卽曰諒茲小醜不難指日蕩平而
十餘年來賊之猖獗尤甚 僧邸以馬隊擅長而前後被擒奪

去馬匹至四五千之多淮軍以洋槍擅長而昨亦被擒奪去百餘捍賊勢日熾我輩自應倍加敬懼明末流賊之患亦係旋散旋聚旋滅旋起後遂至於不可收拾貴軍門老於軍旅諒必見及斷不宜輕視此賊也

銘字營劉軍門銘傳稟軍抵龍垵集剿賊獲勝情形

此次各軍環集東境該逆遽爾遠颺未能痛加懲創殊堪憤恨幸貴軍有此一戰足以挫凶燄而快人心惟該部將士自鄂皖而東豫一月之間馳驅數省勞乏已極應卽察看眾情略與休息再行跟蹤追躡如賊至湖團貴軍應會商劉鎮老湘一軍設法夾擊老湘營之長矛劈山礮尙屬得力劉鎮亦極有血性惟人數單薄且素未與擒匪交仗貴軍門將羣擒技倆及制寇之術詳細指示俾不至於喫虧所有出力之營總保成等三員仰候隨摺請獎訓導王琪監生于廣安接引官軍尤爲難得應照所擬歸於黃陂案內奏獎卽由貴軍門先行飭知可也

批牘卷三

五

全軍營務處李副將昭慶呈軍抵嘉祥城門不開請飭行
東省州縣遇有官兵到境勿得堅閉城門由

查張逆大股初二夜棄鉅野之太平集向西北竄去初三日遂撲鄆城初四日潘臬司一軍接仗於城西十餘里之磻溪渡是逆蹤距嘉祥城有百餘里該軍初五日馳抵城外黃令何得閉門不納該令以地方瘠苦不能供應兵差儘可當面說明本部

堂近在濟甯亦可稟明斷不强令應差至於堅閉城門禁絕出入則大不可并不出城稟見一次尤屬荒謬兵勇亦 皇上之赤子城池乃 皇上之城池原非該令所得而私似此行

爲實出情理之外東豫兩省民間圩寨本已恨兵如仇若各州縣再爲之倡則以後行軍處處皆成荆棘實屬有礙大局仰候咨請閩撫部院將嘉祥黃令卽行撤委奏參以示懲警

唐殿魁稟蒙保奏衢州鎮總兵員缺奉到行知由

該鎮從征各處衝鋒陷陣爲銘軍得力良將此後名位日隆益當從勤廉二字上用功勤則百事具舉閭營可保常新之氣廉則取子不苟眾人皆有畏服之心看似老生常談而名將名臣不出乎此常常畱意則異時勲績如日方升而未有艾也

批牘卷三

吳

張編修錫嶸函牘一件並另呈覆現在籌備各事宜由

貴編修於回營後極力整飭籌布防守事宜諸臻允協良以爲慰其所陳八條惟第六條絕賊糧法非不善然斷非命一委員張貼告示所能做到臨淮百餘里內外亦恐號令有所不行存糧不准過石違者以通匪論恐委員卽借此以擾民生事雖有愛民之政亦須出以肫誠委曲若惟恐民之不便者王介甫不知此義故青苗雇役其志亦將利民而遣使非人適以害民且存糧太少必不能辦到凡出一令而僅託空言者不出可也

統領老湘營劉鎮松山稟遵批前進追擊捻逆由

捻逆大股逼近湖團該軍甫經出隊卽行颺去殊可憤恨刻下該鎮旣已全部拔動作爲游擊之師應卽尾追緊躡期於力戰數次獨當一路不必依傍他軍以成功度該鎮之才力足以辦此會商進剿之說不過使彼此聲勢聯絡使該逆有所牽制而我得專力一方至於臨敵應變則非他人之所能爲力也大抵打仗貴於自立不可存借助將伯之心使弁勇稍生意忽謀事貴於謙下須常存廣詢求助之心使他軍樂於親附二者看似相反實則相成均不可少至囑至囑

老湘營劉鎮松山稟報剿敗巨股捻匪大獲勝仗由

曹縣之役該軍初次與捻相遇鏖戰終日卒以穩慎獲勝力遏

批牘卷三

堯

凶鋒欣慰無已本部堂屢詢捻匪長處在馬隊四面包圍騎賊好用大刀長棒步賊好冒煙衝突然終以未能目覩恐致隔膜今該軍經此大戰之後於賊之所短所長自必一一了然究竟捻眾伎倆在粵匪諸僞王中於何酋最爲相似官軍宜以何法制之仰熟思稟復

候選訓導計棠稟呈豫中採訪記略摺

該員在汴已久於豫中風土人情當已洞悉各處圩寨如何而後可以禦賊如何而後可與官軍相安本部堂前次發去之批是否接到稟中一字不題而忽發此題外之論洋人之患此天所爲實非一手一足所能補救本部堂分內之事現在專重在

勦辦捻匪但使捻匪之凶燄少減一分卽爲朝廷釋一分之憂勞該員分內之事現在專重查辦民圩但使兵民疑團稍釋一分卽爲本部堂寬一分之責任此外非分內而又萬難做到之事不必多管成大事者多在銖積寸累上用功如殷浩呂頤浩輩志非不大其究何嘗有分寸之補該員若專事高掌遠蹠竊恐一無所成也采訪記略摺存閱

臨淮營務處張編修錫爨呈明撥勇三百名令左營正幫辦張德修帶往漕北九灣等處彈壓由

抽撥防兵鎮壓民圩免爲賊所迫脅用意亦厚惟三百人太單不足以禦寇氛本部堂向不冒抽撥零隊恐其無益於彼有損於此也以後仍須審慎頃沈錫瑾至此言及該軍哨官什長勇夫每日均僅發錢百文半年以後仍准找領全數弁勇頗有怨言又稱臨淮銀價有時可換至一千四百以外而該軍概以一千三百文合算人有不服等語查勇丁惟利是視朝三暮四數本相等而眾狙皆怒此人之常情至以錢扣銀縱使優於市價人猶疑之况少減毫末乎沈錫瑾係被屏斥之人未必可信此二事實情何如應否酌改仰一陳及

盛字營周鎮盛波稟回稟就近發餉及全軍拔隊赴豫勦

賊由

數月以來該鎮攜行隊二千餘人擊賊雖數次獲勝而該逆究

未大受懲創者未嘗非人數太單之故此次回毫將月餉趕放全部悉拔以行期與此賊縱橫馳逐兵力既厚各將士膽氣更壯卽該鎮亦無內顧之憂從前鮑軍門近日劉軍門皆不宥分兵行則全部俱行戰則全部俱戰爲賊所畏總由大力盤旋不僅出零隊翦尾股小吹小打而已該軍旣作游擊之師自後須奇正并用正則排開大隊苦戰竟日之類是也奇則黑夜劫營專截輜重之類是也望好謀而善用之

盛字營周鎮盛波稟奉到

諭賜白玉翎管各件懇附

片具奏代謝

天恩由

來稟已悉

御賞翎管搬指等物業經祇領分藏該鎮係實

批牘卷三

全

缺人員自應具摺率同胞弟謝

恩候卽代辦陳遞嗣後該

鎮兄弟受

恩愈渥報稱愈難益當飭厲戎行力圖滅賊公

則紓

朝廷之憂患私則保昆季之勳名本部堂於該鎮實

有厚望乃近聞各處輿論於該軍不免微有間言二月閒賊由睢州東竄該軍曾由睢西至杞縣聞賊將至仍卽折回未與賊迎戰言該鎮有家眷住歸德城內都司高琢家欲入該軍者皆賂高琢以進故該軍頗染豫兵習氣三月內該鎮赴東省勦賊當二十四五賊氛逼近歸德之時營內有婦女數十人皆蘇常裝飾由西北兩門冒雨入城見者深以爲異又其時附郭東西時見邊馬適該鎮新招馬勇中有孫姓者日與四五人躍馬出

城不著號衣因此鄉民間有謂馬勇冒賊者又聞該鎮由山東
回歸德途經劉家口該寨不肖開門遂將該寨之人責打聞者
亦遂譁然四月初旬賊犯歸德境內該軍拔營赴亳不救歸德
之急宋人怨之如此之類雖係傳聞之詞未可盡信然亦未必
盡出無因本部堂實用憂慮一則以豫中兵民仇隙已久全賴
該鎮等以節制之師推示大信使民間漸釋疑團聯爲一氣若
該鎮等染豫軍積習則以後更有何人挽回風氣一則以淮勇
各軍經李爵署部堂與各統領經營數年之力始成今日規模
始成今日紀律斷不可令絕好之聲名因數事而貽人口實履
霜堅冰不可不慎該鎮兄弟能謀善戰治軍嚴明久爲豫人所

批牘卷三

三

欽服仰將以上各節查明如實有其事卽行懲儆更改不特該
鎮兄弟自保令名卽與本部堂曉諭圩寨之告示亦不違背與
李爵部堂訓練淮軍之苦心亦不辜負矣仍仰逐層稟復

統領老淵全軍劉鎮松山

統領星字吉中豫字營朱牧式雲

稟軍抵王家後林遇賊

接仗獲勝由

王家林之捷昨於該鎮等初六日稟內批令補具備案今此稟
已到卽無庸再具矣該鎮等軍長處全在穩持穩擊隊伍不亂
鎗礮不斷故能制此悍賊從此由穩而加之以猛隊伍不僅整
於排立之時而并能整於追逐之時當更可立偉績也我軍長
矛與賊矛對刺對撥時究竟能勝賊矛否便中再一稟復

壽春鎮徐鷓稟標兵剔除舊習可期振作等情

本部堂治軍多年所諄諄教士卒者只有四事曰戒騷擾戒煙賭操隊伍操鎗礮教文武官員只有二字曰勤曰廉該鎮正派慈祥若能守定此數端必可正綠營之風俗也

銘字營劉軍門銘傳稟請添馬隊并親兵步勇由

各軍馬隊皆不能與賊交手惟貴軍門臨陣體察自出機杼所練馬隊可與捻逆回合鏖戰據稱迭次奪獲賊馬足敷一營之用既可刻日成軍應准卽添一營派張佩之管帶以資勦辦其口糧由徐州糧臺照章給發以成軍後奉批之日起支至陸軍親兵三哨應行酌減前接李爵署部堂來函云餉項支絀各軍

批牘卷三

奎

若添步隊一概不宜允准若請添馬隊亦須裁減步軍之額騰出馬軍之餉近又接一函云湘鄂兩省鹽釐大爲減色戶部催加鹽課并索鹽釐峻詞詰責餉源愈絀各等語又接湖南來文所撥霆軍月餉二萬五千兩湘鹽局竟無銀可以應撥解付是各軍不能再增步兵餉項實限之也惟貴軍門好養絕人之技敢死之士古來名將亦往往精選帳下健兒以備緩急張勝琦等兩隊其中當不乏壯士此等亦少而見珍應請挑畱數十人常置左右其餘或撥補各營假汰之缺或竟行遣去查刊本營制載統至萬人者每月加銀三百兩加夫三十名貴軍門應按月支領以爲畜養健兒之用候飭徐州糧臺知照

盛字營周鎮盛波稟任賴股匪西竄我軍攔頭截擊獲勝
由

該軍一敗牛逆於白龍王廟再敗任賴等逆於棗庄集皆以少
敵眾力挫凶鋒遂紓皖中之禍可勝嘉慰自四月初該軍由曹
回宋本部堂以相去太遠不復遙制該鎮自爲進止惟未救歸
德之急不滿宋人之望此外則或追此股或剿彼股遲速往返
多合機宜如任賴尙在沙河以東應卽乘此聲勢盡力追剿如
業已渡沙渡淮而南則該軍不必遠追頃劉軍門潘臬司等軍
辦沙河之防扼賊不得北竄該軍七月應予休息亦須在沙河
東岸會防也

批牘卷三

畜

臨淮營務處張編修錫嶸呈明敬字營曩擬支發餉項條
規繕摺呈鑒由

平日雖僅發百錢而隨時結算清給找領不惟不俟半年且無
踰月此斷無致怨之理惟銀價餘出些須另歸申餘簿爲本營
辦公之用議定按月發銀而假期內仍僅發百文此二者當爲
疑之所由生怨之所自起貴編修有營務之責臨淮糧臺每月
有議作銀錢價值之稟由本部堂批准飭行各營遵照該軍以
銀作錢應卽按照稟定批准之數核算糧臺門外懸一牌營門
外懸一牌下月議價之後乃換上月之牌自足取信於人申餘
之簿決不可立另摺擬議各條均屬詳細惟截曠一節本部堂

向例於各營遣撤之時酌量該軍立營之久暫人數之多寡批令總繳截曠若干或令繳出或在欠餉內畫扣爲數并不甚多均係屆時定議不於未經撤營之前零星呈報動撥此項款餉或存或用概由貴編修主政辦理本部堂此時不與聞也

銘字營劉軍門銘傳稟防河事宜俟抵周口與潘張二軍

通力合作由

防守沙河之策從前無以此議相告者貴軍門創建之本部堂主持之凡發一謀舉一事必有風波磨折必有浮議搖撼從前水師之設創議於江忠烈公安慶之圍創議於胡文忠公其後本部堂辦水師一敗於靖江再敗於湖口將弁皆願去水而就

批牘卷三

五

陸堅忍維持而後再振安慶未合圍之際祁門危急黃德糜爛羣議撤安慶之圍援彼二處堅忍力爭而後有濟至金陵百里之城孤軍合圍羣議皆恐蹈和張之覆轍卽本部堂亦不以爲然厥後堅忍支撐竟以地道成功可見天下事果能堅忍不懈總可有志竟成辦捻之法馬隊卽不得力防河亦屬善策但須以堅忍持之假如初次不能辦成或辦成之後一處疏防賊仍竄過沙河以北開歸陳徐之民必怨其不能屏蔽中外必譏其旣不能戰又不能防無論何等風波何等浮議本部堂當一力承擔不與建議者相干卽有咎豫兵不應株守一隅者亦當一力承擔不與豫撫部院相干此本部堂之貴乎堅忍也游擊雖

勞而易見功效易收名譽防河雖勞而功不甚顯名亦稍減統
勁旅者不屑爲之且汎地太長其中必有極難之處貴軍門當
爲其無名者爲其極難者又况僚屬之中未必人人諒此苦衷
識此遠謀難保不有一二違言貴軍門當勤勤懇懇譬如自家
私事一般求人相助央人竭力久之人人皆將鑒其誠而服其
智迨至防務辦成則又讓他軍接防而自帶銘軍游擊人必更
欽其量矣此貴軍門之貴乎堅忍也若甫受磨折或聞浮言卽
意沮而思變計則掘井不及泉而止者改掘數井亦不見泉矣
願與貴軍門共勉之

盛字營局鎮盛皮稟遵批確查各情由

批牘卷三

吳

該鎮今年二月聞賊犯東省之信拔隊赴杞迎勦張牛等逆旋
由蘭考一帶奔竄尾股距杞不遠該軍抵杞後縱不能迎擊大
隊亦當略停二三日派兵追其餘黨始足以塞杞人之望乃該
鎮一聞賊蹤離杞旋即退回當時該軍尙無城武荷澤之戰故
未能取信於人本部堂所聞輿論卽係指此次而言非指三月
十二任賴股匪由周口回竄一次也迨張牛一股二十七日與
該軍接仗後四月初至十三四日在單縣碭山虞城盤踞十餘
日去宋近而去毫遠該鎮初二日自宋赴毫正歸德喫緊之時
何謂旬後方有警信其時任賴股匪由碭蕭睢甯宿桃以趨泗
州亦并未入毫也馬勇冒賊卽指陳明昇之勇而言當賊氛密

邇歸德之時該營雖尙未呈冊驗點名而各勇已自稱爲周軍矣都司高琢旣係職官又租其屋何得謂并無名目受賄卽無實據然其人之向爲宋人所鄙已可概見攜帶家眷雖非該鎮所爲而出自左營官周提督壽昌實屬有違紀律應將周壽昌摘去頂戴姑免參辦以示薄懲准軍聲名久爲蘇豫皖齊等省所稱該鎮等兢業維持猶恐不能饜人之望若似此不加警惕始則漸鬆漸懈繼則怙過飾非以一軍之紀律日疏連累諸軍之聲名皆壞不特本部堂所不許亦眾論所不容也茲再苦口勸誠望該鎮反躬內省毋護前失與諸將共相勉勵改過不吝卽是一大善矣

批牘卷三

七

盛字營周鎮盛波稟蕭縣令吳士鑑前稟盛軍爬城滋鬧一案遵批查覆由

來牘申覆各情本部堂查閱吳令原稟詳加察核如吳令所稱該鎮飭備米麪之文係初六投遞而填初五日期該鎮則云初五派員投遞不收初六再遞始有收納該鎮所稟自係實情當初五日該軍勇丁赴城倉猝之間吳令一味疑慮不宥開城故不知該鎮已備公文也該營什長王從善被搶一節吳令稟稱訊據王從善供稱銀兩洋鎗已交伊母收藏並無被搶情事取結附卷釋令回營該鎮則云迄今從善未回王從善旣係蕭縣人自係在家逗留毫無疑義如果銀兩被搶反遭吳令禁押至

今豈有事隔四十餘日該鎮忍耐不問直至此次飭查始云是
否釋放尚候移詢此理所不可信者也米麪萬斤牛車十輛吳
令所稟與該鎮所覆相符至所稱備夫二百名牛車四十輛均
係一時爭論之言並無其事不足置辯委員勒索程儀一節吳
令稟稱鄭從九勒銀十八兩張守備勒銀十四兩該鎮則稱找
回購糧尾銀數目相近究竟是一是二必應澈底根究吳令藉
差科派車輛一節該鎮但稱鄉民來營申訴究竟有無呈詞證
據亦應切實查訊仰候札飭徐防營務處李道傳集確查稟復
核奪至近來軍行所到之處東豫州縣往往閉門絕市牧令避
不見面將弁深以爲苦江南不可更染此風吳令久畱該營云

批牘卷三

矣

因痰發偃臥斷不可信其云吸食洋煙當非無因候咨督漕撫
三院飭司卽將吳令撤委赴徐聽候查訊該鎮亦飭委員鄭國
紳赴徐聽候查訊

委辦宿州查圩事務張牧雲吉稟詣查各圩沿途阻水延

滯緣由

今年水勢過大淮南北幾成澤國圩寨傾塌者何可勝數亂後
子黎遭此災厄自顧不暇何暇修築圩牆自未可催督過急所
幸賊氛稍遠尚可從容以圖歸併圩寨已是查圩第二義凡圩
戶至一二百戶者卽難驅併蓋安土重遷人之常情不如更易
其圩長而教導之圩長之抗傲不遵情節較重者枷之責之尤

重者殺之本部堂查圩之始其意專重在訪拏積匪多殺數人便足以靖根株而消反側該牧查辦圩務不爲久而誅戮僅及十人此威信之所以不立也若欲平毀圩寨興眾動兵則二百人不足以濟事若搜拏積匪則二十人已餘且各圩團民亦可號召事畢之後酌予賞錢本部堂原所不惜蒙城亳州各員多用此法以集事觀該牧歷次來稟於查匪一事似尚未得要領豈姑息以邀譽乎抑才不足以勝任乎卽如稟中所稱拏獲窩匪之魏廣春魏三科等何以不殺魏慶洪李昌林等何以不革革之而該圩長猶從中作梗拏而殺之可也蓋殺數壞人而保全一圩則其事易因圩中有數壞人而遂欲平圩犯眾人之所不欲則其事難也現在旣無可撥之營頭亦無餉項可以再募勇丁所請添募二百營之處礙難允行

批牘卷三

完

老湘營劉鎮松山稟請另擇便地駐歇及探報賊情由

本部堂初次防河之議本令該兩軍駐於賈魯河沙河之東岸分防一段約長四十里等語十九日檄行後又慮該軍分防不便是夜復有一批如該二軍現在距河已遠不能折回抑或慮分定一段之後將來不能抽出游擊則不管防河之事亦可隨卽印發在案不知已接到否現在朱仙鎮以上河工豫軍辦理尙未就緒朱仙鎮以下隄牆雖已粗成尙未分段置守而任賴張牛各匪相逼而來志在東竄頃檄銘鼎兩軍由中牟尉氏迎

頭堵截日來尙未接到劉軍門潘臬司函稟不知行抵何處亦不知曾否見仗果能遏其東竄之路否劉臬司楊鎮兩軍十二至許州該兩軍擬由郟縣至襄城計與劉楊相隔不遠若賊已西竄該四軍不必力追恐鋌而走險反以速其東竄之謀一過汴梁以東各軍皆在西路尾追不及大局恐又全壞矣此時賈魯河之防自張市扶溝以下水勢尙深頗覺可恃惟張市以上直至汴梁以北處處可慮一月之內淮軍湘軍豫軍均須抵防此段爲屏蔽東路之計應俟河防辦理穩固確有把握再行分道窮追張市扶溝以西稍遠者爲長葛爲洧川爲許州最近者爲鄆陵爲尉氏該兩軍應在葛洧許州一帶扼駐卽以少資休息朱仙鎮汴梁之西稍遠者爲鄭州爲二鄭中間之郭店最近者爲中牟劉楊二軍應在郭店鄭州一帶扼駐俟賊西去已遠該四軍再定進止防河之事該鎮不必管矣張鎮養病魯山未卽來營仰錄此批與之一閱仍事事函商而行并與劉軍門潘臬司劉襄辦楊鎮常常函商聞豫軍宋鎮謀勇俱優該鎮與之共事已久亦可錄批與之熟商也

批牘卷三

七

西義甯州釐卡委員朱令寬成稟公暇得與陳守寶箴李生至若陳等讀書論古藉資切劘等情

不朕曾否具坊辦事又得陳守李生等讀書論古問學日新至

孤之理玉無終閔之輝亦會有賞音也本部堂六月十五日由濟甯水路東下八月初九始抵周家口患病旬餘現請假一月調理矣

襄辦軍務劉臬司秉璋函報任賴張牛似將合併東犯等情

昨據許州稟報言該軍抵州後十二日任賴股匪聞知官兵已至卽由石固向禹州西走又接劉鎮松山來稟言湘軍已抵郝縣據探任賴各逆在襄城以北張牛兩逆在禹州東北擬卽由襄城進勦計該軍與劉張相隔不遠當可一收夾擊之效惟該逆此次志在東竄前檄銘鼎兩軍由中牟尉氏迎頭堵截日來

批牘卷三

主

尚未接到劉軍門潘臬司函稟不知行抵何處亦不知曾否見仗果能扼其東竄之路否刻下賈魯河之防自張市以下水勢較深尙覺可恃張市以上水勢甚淺朱仙鎮以北豫軍興辦尙未就緒處處可慮一月之內各軍當以全力扼此一段賊已西竄該兩軍與湘軍均不必力追恐鋌而走險反以速其東竄之謀一過汴梁以東各軍皆在西路尾追不及大局又全壞矣頃已飭令劉張二湘軍卽在長葛洧州許州一帶扼駐暫顧張市扶溝鄆陵尉氏以西該兩軍應卽在鄭州及二鄭中間之郭店等處扼駐暫顧朱仙鎮汴梁中牟以西均爲屏蔽東路之計俟河防辦理穩固確有把握再飭各軍分道追勦仰與楊鎮商酌

而行并常常與劉軍門潘臬司及劉張二鎮互通消息使彼此知軍行所在豫軍宋鎮打仗甚爲出力亦須一律聯絡也

候選訓導

毛印堂

棠

候選直隸州

州判竇鉅稟妄擬查辦圩

寨章程二十一條開摺呈鑒由

河南圩寨修築已及十年各寨章程行之已久未必盡皆不善各寨人心間有不同而其願保身家性命則人人皆有此心苟可固守斷無不竭力死守者若其力不能堅守則雖會同中丞下一督率之札多發委員頒一極密之章程而其不能守如故也卽嚴定州縣之處分而其境內有可破之寨如故也彼人丁單弱財力貧薄之寨印委各員能一一使之富强哉另摺所陳

批牘卷三

五

如選寨長聯絡各寨已革寨長不准把持圩務收糧入圩禁止抗官編造戶冊等條本部堂四條告示中業已言之凡能言者未必能行如第一條正寨長須擇端方廉幹素負一方之望者此種人卽極不易得此處一差著著皆錯本部堂不肖通飭辦團所慮首在於此該員等若覺寨長處處皆有賢者卽卽自揀一二縣本部堂札派該員等前往經理試行果有效否若六十餘州縣皆派委員必致物議沸騰斷不可行也

統領

銘軍

劉軍門銘傳

稟賊

毀長牆竄逸東境等情

中牟縣十五六兩次來稟賊於十五日未申之間已至中牟城下十六日黎明大股始由城外經過本部堂初八之檄令該兩

軍赴中牟尉氏攔剿據稱擬於十七日赴中牟是自覺本管汛地尚可無虞若於十四日由汴回防之時卽赴中牟堵剿大局或不至決裂縱不能遏之使西但能扼駐一日劉楊趕到卽可痛打一仗此處稍失機宜實爲可惜惟兩軍汛地太長不能不時時回顧是可亮也本部堂於貴軍門初次批牘卽慮有無數波折未必能一次辦成然終始堅持此議如果將來該逆回竄仍須防守此河斷不因難而中輟亦不因浮言而變計尙勉圖之

委辦宿州查圩事務張牧雲吉稟拏獲捻目高繼周等訊

明正法由

批牘卷三

七

正法高繼周等三犯辦理漸覺認真稍爲一慰蒙宿情勢雖有不同而本部堂所辦係拏勾捻之匪徒并未翻苗逆之舊案卽蒙城正法各犯據桂令等節次稟報口供亦皆當捻屬實非以其從苗而殺之也總之查圩之意祇分良莠不問苗捻甘心爲莠者雖概未從苗亦在所必誅洗心向善者雖曾經從苗從捻亦在所必釋該員節次嚴飭之後甫經振作遽欲預爲宿人請命以邀慈惠之名而爲節勞之地殊屬誤會題旨本部堂并非好殺人者辦理之認真與否自有輿論可訪非計殺人之數以較優劣也

